



Skel Rice
MEDIUM GRAIN

Also available in 200g

goodman fielder

PVM2615a



INSAIT

Ol polismeri amamasim Intanesenel De bilong ol meri - P2

Ileksen Toksave P7 na 8

Sister Pierrtte Gagnon fok gutbai long PNG - P14



Ol Papua Niugini Difens Fos soldia, 1RPIR Charlie Kampani i bin kamap Sempion kampani long Taurama Bareks long 2017. Ol i mas long soim kala bilong ol long taim 1RPIR i bin selebretim 66 yia bilong ol long Fraide 10 Mas 2017. Foto Nicky Bernard.

2.5 Milien kopi fama na pipel bai kisim taim

Shirley Gar i Raitim UPNG Jenelisisum Sumatin

BIKPELA hevi i kamap nau long kopi indastri long kantri na Nesenel Egrikalsa Kwarantint na Inspeksen Ejensi wantaim kopi Indastri Kopresen i wari long dispela hevi na ol bai nidim K50 milien long painim ol rot bilong stretim.

Minista bilong Egrikalsa na laipstok Tommy Tomscoll i tokaut long wanpela pres

konpres asde long Pot mosbi olsem Kopi prodaksen i save kisim 1 pesen bilong wol maket na i save mekim mani mak olsem K600 – K700 milien long ikonomi bilong Papua Niugini long wan war yia. Mista Tomscoll i bin holim dispela pres konpres long tokaut long hevi nau i stap na ol wok we Kopi Indastri Kopresen wantaim ol patna bilong en i mekim pinis.

I go moa long pes 3...

PNG Air

Yu Gat Sois

Bukim Tiket
7222 2151
Fri Kol: 1611

Onlain Bukim Tiket:
www.pngair.com.pg

Ol polis meri i amamasim Intenesenel De bilong ol meri

ROYAL Papua Niugini Konstabuleri Edvaisari Netwok bilong ol Meri (RPNGC WAN) i amamas long Intenesenel De bilong ol meri long Mas 8.

Ol meri opisa long Royal Papua Niugini Koraksenel Sevis na Papua Niugini Difens Fos tu i stap wantaim long dispela taim.

RPNGC WAN em i hap bilong ol bikipela Pasifik Ailan Sif bilong Polis Edvaisari Netwok bilong ol meri na i save promotim ol lo bilong jenda ikwaliti, ol plen bilong rikutmen, trening, developmen long wok, na promotim ol polis meri long givim ol sevis long ol komyuniti.

Long Mas 6 i go inap long Mas 8, ol lain i save makim Netwok long wan wan provins i kam bung long wanpela wok-



Ol memba bilong RPNGC na PICP Edvaisari bilong ol meri.

sop we Australia Gavman i sapotim ol.

Dispela bung em bilong lainim moa long ol

wok bilong ol olsem Provinsal WAN Kodineta na bilong raitim Konstitusen o lo we ol bai

givim long Komisina bilong Polis, Gari Baki, long tok orait.



Ol spika long woksop; Komunikesen Menesa-Oil Search, Ruth Waram, Deputi Komisina bilong Polis, Raphael Huafolo, na Australia Hai Komisin Minista Kaunsila, Catherine Fitch.



PUBLIC NOTICE

National Employer Conference

This is an open invitation to all employers contributing to Nambawan Super from both the Private and Public sectors. An employer's conference will be on:

Conference Details

Date: Friday 24th March 2017
 Venue: Holiday Inn
 Time: 9:00 am – 4:00pm

Conference Topics

- Session 1: Fund's Highlights & New Initiatives
- Session 2: Employer's Roles & Responsibilities (contributions)
- Session 3: 2017 Investment Outlook and Property Highlights
- Session 4: Highlights of the 2016 Financial Performance
- Session 5: Highlights of Savings & Loans

Invitation is also open to employers not contributing towards any superannuation fund and want to know more about Nambawan super Ltd.

Please confirm your attendance via the following officers:

Julie Hau Mai – Ph: 1599 Email: jmai@nambawansuper.com.pg
 Marjorie Kwanga – Ph: 1599 Email: mkwanga@nambawansuper.com.pg

Authorised by the Acting CEO of Nambawan Super Ltd, Mr. Vere Arava

WE CARE FOR YOUR FUTURE!

Julie Bishop i go raun long Lae

FOREN Afeias Minista bilong Australia, Julie Bishop, i go raun long Lae, Morobe Provins, long pinis bilong las wik.

Minista Bishop i raun i go long opim Lae Konsulet-Jenerel na lukluk raun long sampela plen bilong Papua Niugini- Australia developmen kop-

resen patnasip, bihani long Ministral Forum o bung bilong ol minister long Madang.

Minista Bishop i tok olsem ol i opim Lae Konsulet-Jenerel i soim gutpela sain bilong Papua Niugini-Australia iekonomik patnasip.

Minista Bishop i bungim planti ol lida

bilong bisnis man na meri long Lae taim em i go toktok long bung we Australia PNG Bisnis Kaunsil na Lae Semba bilong Komesi go pas.

Long wankain taim, em i go lukluk raun long ANGAU haus sik tu na em i pinisim wokabaut bilong em long Nesenel Agrikalsa Risej Institut (NARI).



Minista bilong Foren Afeias, Julie Bishop, na Foren Afeias na Imaigresen Minista bilong Papua Niugini, Rimbink Pato, i sanap wantaim long hetkwat bilong NARI long Lae, Morobe.

Nupela kot haus bai kamap long Bialla

Sif Jas bilong Papua Niugini, Sir Salamo Injia, i toktok long kamapim wanpela kot haus mani mak long K7 milien long Bialla, Wes Nu Briten Provins long namel bilong dispela yia.

Sir Salamo i tokim Gavana Sasindran Muthuvel na ol pipel bilong em long Sarere olsem, dispela pojek bai kamap bikos Is Nakanai LLG i gat populesen i save mekim planti samting long ikonomi na em i stap long gutpela hap na arere bilong Is Nu Briten haiwe.

Em i tok moa olsem Wes Nu Briten em i namba tu long i gat han mak long ikonomi long Egrikalsa Industri na bihain taim bilong kantri bai sanap anap long dispela indastri.

Driman bilong Nesenel Judisiri em i bilong redim ol sevis bilong ol pipel i ken isi long go kam na rejistaim kes bilong ol.

Em i tok tenkyu long Gavana Muthuvel long em i



Sif Jastis Sir Salamo Injia i toktok long Bialla. Ol man i sindaun long lep han i go long rait han em Gavana Sasindran Muthuvel, Lady Piam Injia, Kimbe Residen Jas Ellenas Batari na ekting residen jas, Nicholas Miviri.

givim K600, 000 helpim long kamapim nupela kot haus.

Sir Salamo i tokaut long Kimbe long las Fraide olsem nau em i rijinal sab-rejistri na em i tokaut long ol i makim namba tu Residen Jas,

Nicholas Miviri, na opim namba tu semba bilong ekting jas.

Jastis Miviri i joinim residen Jas Ellenas Batari..

Long wankain taim, Gavana Sasindran Muthuvel i tok, Sif

Jastis na Nesenel Judisiri bilong nupela kot haus em i wanpela projek long Bialla Taun na em i gat inap strong long kamap Distrik Kapital.

Meri amamas long trening

Paul Zuvani i raitim

OL meri i amamas long wok-sop bilong Papua Niugini Praktis Palamen bilong ol Meri Yunaitet Nesen Developmen Program (UNDP) i ranim wok-sop long Pot Mosbi long las wik na ipinis long stat bilong dispela wik.

Tupela meri husat i tokaut long tingting bilong ol em Dokta Susanna Khobu na Josephine Mandawe.

Tupela i namel long 50 meri UNDP i makim long dispela kos.

"Mipela i amamas olsem mipela i tupela ol meri husat i kamap long trening o wok-sop bilong lainim ol wok bilong Palamen," tupela i tok.

"Dispela wok-sop i opim tingting bilong mitupela long planti samting.

"Em i lainim mitupela long wanem ol samting mipela i mas mekim sapos mipela i stap long mak bilong lidasip.

"Ol i trenim mipela long rot bilong mekim lo o sapos mipela i Memba bilong Palamen, ol sevis i stap long Palamen na rot bilong kisim dispela ol sevis.

"Wan wan ol gavman Dipatmen i kamap na givim toktok long rot bilong wok na painim wei long givim sevis long ol manmeri.

"Ol i tok sapos mipela i save long dispela ol rot na wok gut wantaim ol Dipatmen, mipela i ken givim sevis isi long ol manmeri.

"Wok-sop i kamapim tingting long mitupela olsem mipela i mas tingting na lukluk, lukim we helpim i stap, kisim na mekim isi wok bilong mitupela.

"Long dispela rot mipela i ken kisim helpim hariap na bringim sevis i go long ol manmeri.

"Mipela i lainim olsem long kamap lida, wanpela i mas kamap wokman bilong ol arapela.

"Sapos mipela i Memba bilong Palamen, mipela i olsem mauseri bilong yupela. Mipela i bilong harim na bihainim tok bilong ol manmeri long wanem samting mipela i mas mekim," ol i tok.



Dokta Susan Khobu bilong Goroka, Isten Hailans.



Josephine Mandawe bilong Usino Bundi, Madang. Foto: Paul Zuvani

2.5 Milien kopi fama na pipel bai kisim taim

I kam long pes 1...

Kopi em namba tu Egrikalsa ekspot bisnis long Papua Niugini, we i save kisim bikpela mani i kam insait long kantri na kopi i save sapotim moa long 2.5 milien pipel husat i save sanap long strong bilong kopi olsem wei bilong painim mani bilong ol.

Long dispela taim Nesenel Egrikalsa kwarantn in Inspeksen Atoriti (NAQIA) wantaim Kopi Industri Kopresen wantaim helpim bilong Dipatmen bilong Egrikalsa na laip-

stok i wok strong long daunim dispela Binatang (Coffee Berry Borer) we i wok long bagrapim kwaliti na Prodaksen bilong Kofi.

Insait long wanpela pas i go long ol nius lain, Sif Eksektiv Opisa bilong Kopi Industri Kopresen, Charles Dambui i tok CBB o Coffee Berry Borer em inap long kilim namba bilong kopi na daunim gutpela kain kopi na i ken lusim mani long kopi inap long 50 i go 100 pesen.

"Long bipo 2016 prodaksen bilong kopi i bin sanap olsem 1.13 milien beg kopi long ekspot. Tasol long dispela yia prodaksen bilong kopi bai pundaun bikos long dispela binatang," Tomscol i tok.

Long dispela taim ol wokman bilong NAQIA wantaim Kopi Industri bai karim wok painim aut insait long tupela wik, long save moa long asua i kamap olsem wanem na painim aut tu long sampela rot long daunim binatang bilong kopi.

Minista Tomscol i tokaut tu olsem bai ol i nidim mani mak olsem K50 milien bilong karim aut ol sefti mesa long banisim ol kopi insait long kantri. Ol ples we i stap long asua em Banz, Jiwaka, Girigiri, Kamaliki (Hailans rijon) na Yapsi (Telefomin-ESP).

"Mipela bai wok strong long kontrolim na daunim dispela hevi," na em i wok bilong midia tu long helpim long karim infomesen aut i go long ol pipel husat i stap long ples," Tomscol i tok.



Need help to avoid impulsive spending? Protect and grow your money with a **TERM DEPOSIT.**

We are the Bank for Savings

WE ARE BSP



Ol meri kendiket ranim piksa palamen

Josiah Ururu Kana i raitim
LONG Mande 13 Mas, 2017
ol 45 meri husat i tingting
long kamap kendidet long
2017 Nesenel Ilekse i bin
sindaun long wanpela piksa
palamen insait long Ne-
senel Palamen long wan-
pela trening Yunaitet
Nesens Developmen Pro-
gram (UNDP) na Dipatmen
bilang Komyuniti Develop-
men, i bin holim long Pot
Mosbi.

Dispela wan wik trening em UNDP i wokim long strongim jenda ikwiti insait long nesenel politik. Dispela piksa palamen em i bin kamap insait long Stet Fanksen Rum.

Deputi Spika bilang palamen, John Simon i bin go pas long sesen olsem spika bilang palamen na ol narapela bikpela lain olsem Anna

Solomon, Seketeri bilang Dipatmen ov Komyuniti Developmen na Sios, Dokta Alphonse Gelu, Rejistra bilang ol Politikali Pati na Roy Trivedy, UNDP representative na UN residen kodineta i bin stap long lukim dispela piksa palamen.

Ol meri i bin wokim giaman kwesten taim askim ol kwesten long polisi na ol giaman minista na oposisen i bekim tok i go i kam.

Wanpela bikpela toktok ol meri bin wokim em long stopim gan vailens wantaim bilang 2005 Nesenel Gan Kontrol Komiti ripot.

Ol dispela meri husat i laik kamap kendidet bilang dispela ileksen i soim gutpela save long wei ol i toktok na askim i go i kam insait long giaman o piksa palamen.

Bihain long sesen ol i bin holim wanpela pres kon-

prens we Deputi Spika, John Simon i tokaut olsem em i amamas tru long save bilang ol meri long toktok insait long palamen.

“Mi amamas long yupela olgeta long stap strong long dispela wik i go pinis na lainim wei bilang sindaun na toktok long palamen. Em i bikpela samting olsem maus bilang ol meri i mas kamap long pablik,” Mista Simon i tok.

Long wankain taim, Dokta Alphonse Gelu, Rejistra bilang ol Politikali Pati i tok namba bilang ol meri insait long palamen nau em i no inap long soim jenda ikwaliti. Olsem na long 2017 ol i apim mak bilang namba bilang ol meri kendidet long sanap long ileksen.

“Mipela i lukluk long ol wei bilang kamapim pati konstitusen na polisi we bai

strongim Jenda ikwaliti,” Mista Simon i tok.

UN resident Kodineta, Roy Trivedy i tok insait long dispela wan wik ol i bin helpim long strongim sampela ol gutpela kendidet long go insait long politik wok wantaim strongpela tingting bilang ol yet.

“Insait long dispela wanpela wik, ol gavman opisa i givim ol toktok bilang ol polisi i go long ol meri long trening olsem Visen 2050, Midium Tem Developmen Plen na Distrik Sevis Impruvmen Program na tu long Klaimet Senis, famili plening, na ol narapela bikpela toktok. Ol wokman bilang palamen tu i bin lainim ol meri long ol wei bilang stap insait long haus palamen olsem wanpela memba bilang palamen,” Mista Trivedy i tok.

“Ol dispela meri i kamap gut insait long dispela trening na mipela i laik harim sampela gutpela stori long ol taim ol i go bek long ol komyuniti bilang ol na taim ol i statim kempen bilang ol long Epril,” Mista Trivedy i tok.

UNDP i tok tenkyu long helpim bilang Nu Silan Ministri bilang Foren Afes na Tred Gavman bilang Italy wantaim tu long Air Niugini na Gateway Hotel long

sponsasip bilang ol. Mista Ben Micah, Memba bilang Kavieng Open i bin stap long dispela na em i amamas tu long lukim save bilang ol dispela meri.

“Taim mi sindaun na harim yupela wokim dibet em i mekim mi pilim olsem mi wanpela lain bilang ol lain pipel we i wok long dai pinis. Yupela em trupela lida bilang bihain taim,” Mista Micah i tok.

Sinai: Midia mekim bikpela wok

Paul Zuvani i raitim

MIDIA i mekim bikpela wok long lukim ol i mas i gat gutpela na stretpela sindaun i stap long komyuniti, Simon Sinai deputi llektoral Komisina i tok.

Sinai i tok dispela i kamap taim midia i fri long mekim wok bilang em.

Em i mekim dispela tok long taim em i opim llektoral Komisen midia woksop long 17-Mail, Sogeri Rot long dispela wik.

Dispela woksop i bilang redim ol ripota long save long ol toktok ol i mas ripot long em long taim bilang ileksen.

Ol ripota i lainim tu long kaunim vot pepawok bihainim limited preferensal voting sistem.

Ilekse long dispela yia bai kamap long Epril 20 we rit bilang nominesen bai op na de bilang vot bai stat long 24 Jun na ol rit bai go bek long Gavman Haus long 24 Julai.

“Fri na indipenden midia em ol bikpela samting long lukim ol olsem i gat trenspersensi na akauntabiliti long demokretim ileksen wok,” Sinai i tok.

“Midia i helpim tu long tok save, skulim na kamapim awenes namel long ol vota.

“Em i bikpela samting long yupela olsem ol geit kipa long tok save na ripot gut long 2017 ileksen.

“Dispela long wanem ripot no gut na ripot long tok i no stret na tru i ken kamapim hevi long taim bilang ileksen.

“Olsem wasdok bilang lukautim laik bilang pablik, mi askim yupela long jernalis na brodkas opis long mekim balens ripot long



Simon Sinai, deputi llektoral Komisina.

taim bilang ileksen.

“Mi makim maus bilang llektoral Komisina na PNG llektoral Komisen i amamas na welkamim yupela long kamap long dispela woksop.”

Long dispela wik ol ripota i kisim skul long luksave long wok ol i mekim na as bilang wok ol i mekim.

Tupela nius ripota, Patrick Sakal na Joy Kisper bilang National niuspepa i tok ol i amamas long kamap long dispela woksop.

“Taim mipela i no kisim gutpela skul na ripot long ol samting we mipela i no mas ripot long em, dispela i ken givim hevi long mipela yet na ogenaisesen mipela i makim long em,” ol i tok.

“Em i wok bilang mipela tu long mipela i mas wok bung wantaim ol opisa bilang llektoral Komisen long kisim ol trupela tok na ripot stret.”

Woksop i stat long Mande na pinis long asde

Gelu askim manmeri long votim pati

Paul Zuvani i raitim

OPIS bilang Integral Pati na Kendidet (OLIPPAC) i askim ol vota long votim ol kendidet husat i resis long 2017 Ilekse long votim ol kendidet bihainim pati ol i stap long em, rejistra bilang OLIPPAC Dokta Alphonse Gelu i tok.

Em i mekim dispela tok long taim em i givim tok long ol ripota long PNG llektoral Komisen mida woksop long 17-Mail, ausait long Mosbi long dispela wik.


Em i tok hettok bilang ileksen bilang dispela yia em Save long Pati bilang Yu na Votim Pati bilang yu.

Long taim em i tok olsem em i tok em wok bilang wan wan ol pati nau long go aut na tokaut long polisi bilang ol.

Em i givim tok piksa long Pipels Nesenel Kongres (PNC) pati we i kempein long fri edukesen polisi bipo long 2012 Nesenel Ilekse na taim em i kisim gavman PNC i karimaut dispela polisi.

Em i tok nau yet planti manmeri sapos ol i skul sumatin o stap long ples, ol i no save gut long wan wan ol pati na ol kendidet i makim dispela ol pati.

Long dispela Dokta Alphonse Gelu wantaim tim bilang e mi karimaut sevei long Kerema, Galp provins na i painim aut olsem ol manmeri i no wari ol i save long pati o no gat, bikpela



Dokta Alphonse Gelu, rejista bilang Politikak Pati na Kendidet i givim toktok long ol ripota.
Poto: Paul Zuvani

samting ol i votim kendidet ol i laikim.

Em tok tu long wok bilang ol pati eksekutiv na ol memba.

Em i tok ol memba i papa bilang pati na i no ol eksekutiv ol manmeri husat i kamapim pati.

“Dispela em i bikpela paul tingting. Ol Memba bilang Palamen i ken kam na go o ol eksekutiv i ken kam na go tasol pati bai stap,” Dotka Gelu i tok.

“Ol eksekutiv i no kenting ol i papa bilang pati, no gat.

Long taim bilang ripot long 2017 Ilekse, Dokta Gelu i tok ol ripota i mas lukaut long amamas kendidet ol pati i endosim na ol polisi bilang ol.

Nau yet i gat inap olsem 44 pati husat i rejista .

MV Pacific Link helpim ol pipel bilong Is Sepik



Wanpela meri long Kupiano i traime ai glas i kam long YWAM Sips Medikol na Trening tim.

TRENING na Medikol sip bilong YWAM, MV Pacific Link, i win pinis 6-pela mun long mekim ol wok long hap bilong Is Sepik provins.

Dispela sip i bin wok bung wantaim Is Sepik Provinsal Helt dipatmen, Samaritan Aviation na ol lokal helt provaida long givim helt servis na trening. Ol i bin lukim moa long 16,000 sikman na meri long 50 ples long nambis, ailan na bikples long Ambunti-Drekikir, Angoram, Maprik, Wewak na Yangoru-

Saussia.

Gavana bilong Is Sepik, Gren Sif Sir Michael Somare i bin singautim YWAM Medikol Sip long go mekim wok long Is Sepik.

Em i tok tenkyu long YWAM Medikol Sip long wok ol i mekim wantaim provinsal helt atoriti long helpim ol pipel husat i stap longwe tru na i nidim tru helpim bilong ol dokta.

Insait long 6-pla mun, ol i bin givim banis sut long ol pikinini, sekap long ol

belmama, sekim ol tit na stretim ai, mekim operesen, givimaut ol wara filta na givim trening long ol lokal helt woka.

Manesing dairekta bilong MV Pacific Link, Brett Curtis i tok em i amamas long ol wok i kamap long namba wan raun bilong sip long provins.

Mipela i wok bung wantaim Is Sepik Provinsal gavman na lukim planti tausent pipel.

Planti ol spesel stori i kamap long dispela taim, tasol wanpela stori em i bilong

Lena wanpela liklik bebi meri husat i gat 2-pela mun. Em i no inap pulim win gut.

Ol lain bilong Samaritan Aviaion i bin helpim em na bihain ol i kisim em i go long Wewak Jeneral Haus sik na bebi Lena i orait nau.

MV Pacific Link i stap nau long Alotau we ol i mekim wok mentenens long en. MV YWAM PNG i stap tu long Alotau na bihain bai em i go mekim ol wok long hap bilong Sentral provins.

YWAM helpim ol pipel long Kupiano

WANPELA helt kea tim bilong YWAM Medikol Sip i stap nau long Kupiano long Sentral provins long mekim wok bilong helpim ol sikman na meri. Dispela medikol tim i stap long graun na raun i go insait long ol ples.

Ol i wok bung wantaim ol helt woka na Abau Distrik Edministresen long sekim ai na tit na givim helt edukesen long Kupiano Helt Senta.

Insait long wanpela wik, dispela medikol tim i bin tritrim 655 i gat sik long ai

stretim tit bilong 114 pipel. Samting olsem 2,000 pipel i bin kam long ol helt awenes toktok.

Wanpela bilong ol lain ol i bin lukim em Openi, mama bilong foapela pikinini. Em i gat 35 kris-mas. Open i olsem aipas, em i no inap lukluk gut. Optometri tim bilong YWAM i sekim ai bilong em na putim aiglas na em inap long lukim ol samt-ing.

Sentral Provins Distrik Helt Kodineta, Sista Rigolo Mokela i tok ol i amamas

long wok wantaim YWAM tim long Kupiano Helt Senta.

Em i tok klostu 20 yia ol i no gat dental na ai servis olsem na olgeta de ol pipel i sanap long longpela lain tru long kisim dispela servis. Em i tok ol i amamas tru.

YWAM Medikol Sip bai i wok long hap bilong Sentral provins long dispela mun wantaim sip bilong ol YWAM PNG. Sip bai lusim Alotau long go long Abau long dispela wik. Moa long 100 volantia bilong 12-pela kantri i stap long dispela sip.



Ol ples i stap arere long Sepik wara i kisim medikol servis long MV YWAM PNG Medikol na Trening volantia tim.

Ol Siwai i sekan na tok sori

PASIN bilong sekan na tok sori bai opim rot bilong strongim Bogenvil long lukluk i gohet long wanem samting bai kamap.

ABG Minista bilong Dipatmen bilong Bogenvil Pis Agrimen na Implementesen na Memba bilong Motuna/Huyono/Tokunutui, Albert Pung-hau i mekim dispela toktok long wanpela seremoni i kamap las wik long Rabaulu, long Siwai distrik.

Mista Pung-hau i tokim ol pipel olsem sekan na tok sori em i rot Bogenvil i mas bihainim long stretim ol samting nogut i

bin kamap bipo na bai i gat bel isi na gutpela sindaun i ken kamap.

Mista Pung-hau i bin go pas long toktok long dispela seremoni. Em i luksave long ol lida bilong Saut Bogenvil husat i dai pinis, olsem Jonathan Ngati, Anthony Anugu, Sir Paul Lapun na Steven Kamma Pirika.

Em i tok, Ol dispela lain i givim laip bilong ol long kamapim gutpela sindaun bilong yumitude, na wanem samting yumi bai bungim long dispela rot yumi bihainim nau.

I bin gat 205 lain i

stap long dispela bikpela seremoni bilong sekan na tok sori. I bin gat ol dispela hevi i kamap long ol eria long Siwai we ol BRA i bin kontrolim. Ol dispela lain i kamap ples kliia na soim olsem ol i wanbel long sekan na tok sori olsem na dispela seremoni i bin kamap.

Dispela seremoni i bin kamap long nupela wei, i bin gat kastam pasin, Mih-mihyetu, bilong ol lida i kamap pastaim na bihain ol lain i bin sekan na tok sori.

Ol lida husat i bin stap long dispela sermoni em Ne-

senel Minista bilong Saut Bogenvil Timothy Masiu, ABG Minista bilong Edukesen na memba bilong RAMU, Thomas Pataaku, ABG memba bilong Kopi, of opisa bilong ABG Dairektoret ov Pis, ol opisa bilong Bogenvil Pis Biding Tim, ol sif na ol sios lida.

Long narapela bikpela seremoni bilong sekan na tok sori long Siwai, bai gat 403 lain i kamap na narapela 604. Siaman bilong ol komyuniti gavman long Siwai, David Mikisa i bin tokaut long dispela plen.



Ol bikman i kamap long taim bilong sekan long Siwai. Foto: Eleanor Maineke

321 PNGIPA sumatin i kisim pepa

AUSTRALIAN Hai Komisin i amamas na tok tenkyu long 321 sumatin bilong Papua Niugini Institut bilong Pablik Edministresen (PNGIPA) i kisim pepa bilong ol long las wik Fraide.

Long ol sumatin husat i kisim pepa, 42 bilong ol i pablik sevan na Australia i awodim ol wantaim diploma aninit long Pasifik Lidasip na Gavanens.

Long ol meri i kisim pepa, 54 pesen bilong ol i pinis long Diploma bilong Gavman (Menesmen), na Diploma Trening Disain na Dvelopmen.

PNG na Australian Gavman i join na kamapim ol dispela kos long dvelopim ol strongpela lida bilong pablik sekta.

Kaunsila bilong Australian Hai Komisin, Jodie McAlister, i tok olsem ol sumatin husat i kisim pepa bilong ol i mas amamas long ol i winim mak.

“Dispela greduesen seremoni em i amamas taim bilong hatwok we ol sumatin na woklain bilong PNGIPA i mekim,” McAlister i tok.

“Ol sumatin husat i kisim pepa bilong ol bai amamas na soim wanem samting ol i lainim long skul long wok ples bilong ol.”

Long wankain taim, planti ol bikpela lain i amamas na tok tenkyu tu long ol sumatin husat i winim mak na kisim pepa bilong ol.



Julien Sipo i pinism skul na kisim pepa long Diploma bilong Gavman (Menesmen). Julie i sanap wantaim Sentral Provinsal Edministreta.



Lucy Christopher long han kais i kisim Diploma pepa bilong em long Australian Hai Komisin Kaunsila- Ikonmik Gavanens, Jodie McAlister. Lucy i save wok wantaim Dipatmen bilong Jastis na Atoni Jenerel.



Bipo danis bilong Huli Wigmen i welkamim ol sumatin husat i kisim pepa.

Distrik helt opisa helpim ol wanwok

Loutova Siapea i raitim

OL wokman na meri long olgeta level long ol bisnis haus, gavman ejensi na ol sekta olsem helt na edukesen i save laikim tumas long mekim wok bilong ol.

Planti taim ol i save mekim wok, maski sapos ol i no gat gutpela haus slip na ol arapela gutpela samting bilong opis na haus we ol i ken helpim ol yet.

Tasol planti wokman na meri i save gat bel hevi na lusim wok bilong ol, long wanem, i no gat gutpela luksave i save kamap long holim ol bek long wok.

Dispela tingting i bin kamap na Distrik Helt Opisa (DHO) bilong Unggai/Bena distrik long Isten Hailans Michael Boko i bin wok wantaim ol lokal lida na em i baim ol wait kompyuta na wara pam long givim i go long ol helt wokman na meri long Sigerehe Helt Senta long Bena Bena distrik.



Long taim bilong presentesen, Boko i tok em yet wanpela helt woka tu na em i luksave long nid o wanem samting ol wokman na wokmeri bai laikim.

“Sapos yumi ken luksave na lukautim gut ol wokman na meri, ol bai i stap na mekim

wok bilong ol wantaim amamas. Yumi mas givim ol samting we bai inap long holim ol bek long mekim wok bilong wantaim belisi na amamas”, Boko i tok.

Opisa In Sas (OIC) bilong Sigerehe Helt Senta, Salianner Angai i tok dispela i luk olsem

namba wan taim tru long kain samting i kamap long distrik na provins.

“Mipela i amamas tru long Mista Boko husat i helpim mipela long stap bel isi na amamas long wok strong long helt senta bilong mipela”, Angai i tok.



Graun na dvelopmen

SAMPELA yia i go pinis mi bin go raun long kantri Amerika na mi lukim planti tarangu manmeri long strit, long sait bilong ol stua, ausait long ol haus kaikai na aninit long ol bris.

Mi bin sori no gut tru bikos long dispela taim Amerika i bin givim aut ol grin kat long ol manmeri bilong ol arapela kantri husat i laik go stap long Amerika. Taim Amerika i tokaut long wol olsem em i amamas long ol pipel long go stap long Amerika planti pipel bilong em yet i no gat haus na kaikai na i slip nabaut long ol kona.

Planti yumi i no tingim tasol long taim PNG i wok long rere long kisim independens planti tok lukaut i bin kam olsem PNG i mas was gut long ol hevi bai i kam wantaim dvelopmen bilong kantri. Yumi lukim insait long 30-pela yia bihan long independens pasin bilong slip long strit na singaut long kaikai i kamap pinis.

Wanpela gutpela samting ol lida husat i bin wokhat long kisim independens i bin mekim, em long larim graun bilong ol pipel i stap long han bilong ol pipel yet. Dispela i mekim na bikpela lain pipel long PNG nau inap stap insait long wok dvelopmen bilong kantri. Ol fama i groim kakao, kopi na kaukau na kumu long graun bilong ol yet na mekim mani na lukautim ol yet.

Skelim! Amerika em i ples bilong pipel long olgeta kainkain kantri. Planti pipel bilong ol i lusim asples bilong ol na i no hangamap moa long graun. Ol i painim hat tru long painim kaikai, baim rent na pawa bilong haus olsem na ol i mas go slip ausait. Ol i mas lusim ol famili bilong ol na painim rot long helpim ol yet wan wan.

Tingim! Long liklik wei long PNG olgeta yia planti pipel i save lusim ples na kam long Mosbi na ol arapela siti na taun long painim skul, painim wok o long stap liklik wantaim famili. Sampela dispela pipel i save guria taim ol i harim olsem graun bilong ol i go pinis long han bilong dvelopa.

Planti hevi we i pusim ol pipel i go kamap tarangu i save kamap taim ol pipel i no gat graun moa. Antap long graun man o meri husat i hangre inap planim kaikai na lukautim em yet. Antap long graun man o meri i ken mekim haus na stap olsem famili na komyuniti. Graun em i olsem glu em i holim ol pipel i stap olsem famili na komyuniti. Mani i save mekim ol famili i wok resis olsem na bruk pasin i save kamap.

Taim wanpela man o meri i go stap long siti na taun na laip i hat tumas dispela man o meri i ken stap tarangu yet, o go bek long ples na yusim graun bilong ol yet long lukautim ol yet.

Dvelopmen i spit tru na em i hangre long graun. Em i save grisim ol papagraun long sampela mani, namba na graun i save lusim ol pipel. Sampela dispela ol dvelopmen i save rausim ol pipel long graun na dispela pasin tarangu i no moa hevi bilong taun tasol, em i go insait long ol ples.

Yu bai larim graun bilong yu i go o yu bai painim sampela rot long yusim dispela graun long bringim amamas na gutpela sindaun i kam long yu, famili bilong yu na klen bilong yu?

YWAM medikol sip stap long Siassi

With Heart Felt Sympathy



Late Sir Manasupe Zurenuoc KT MBE LLB, (1960-2017)

The Boards of Directors, the management and staff of the Mineral Resources Development Company Group send our deepest condolences to Lady Josephine and children Theresa, Zurenuoc Makili Jr and Pauline Zurenuoc, the immediate relatives and close friends on the passing of Late Sir Manasupe Zurenuoc.

Sir Manasupe Zurenuoc was appointed as Chairman of the board of MRDC in November 2013 in his capacity as the Chief Secretary to the Government of Papua New Guinea, and served until his retirement from public service in February 2016.

Sir Manasupe was a highly distinguished public servant and a respected leader.

The late Sir Manasupe made an invaluable contribution to MRDC during his time with the company. He was extremely supportive of the role of MRDC in delivering landowner benefits through its long term sustainable programs which saw a number of significant investment decisions made during his term on the Board.

The MRDC Board and management will certainly miss his contribution and presence.

May His Soul Rest in Eternal Peace.

Augustine S. Mano
Managing Director & CEO



Custodians of tomorrow



Ol lain volantia bilong MV YWAM PNG Medikol Sip i stap long Siassi.

Ol lain bilong Medikol sip, MV YWAM i pinisim wanpela patrol i go long hap bilong Tewai/Siassi long Morobe Provins.

Ol i bin wokbung wantaim Morobe Provinsal Helt na bringim helt sevis na trening i go long moa long 4,000 pipel long tupela wik. Ol i bin go lukim 23 viles na givim banis sut, sekim ol bel mama na ol liklik pikinini, stretim ol tit, sekap long ai mekim aweanes na givim trening long ol het woka.

Gavana bilong Morobe, Kelly Naru i bingivim K500,000 sek i go

long YWAM Medikol Sip tim long wanpela seremoni long Lablab stesin.

Em i tok long tupela via nau, YWAM Medikol Sip i givim bikipela sevis tru long ol pipel ol stap longwe long nambis na ol ailan bilong Morobe.

Gavana Naru i tok ol i bung wantaim na kamapim gutpela sevis bilong helpim ol rural pipel. Em i gutpela wokbung na bai yumi gohet long skruim i go bikipela.

Dairekta bilong YWAM Medikol Sip, Ken Mulligan, i tok tenkyu long sapot bi-

long Morobe provinsal Gavman.

Em i tok Morrobe gavman i save kirapim wok bilong helpim ol lain i stap long ol ples longwe tru. Em i tok ol i amamas long strongpela sapot na wokbung wantaim Morobe gavman inap tupela via nau.

I bin gat 102 volantia bilong 20 kantri we 28 i bilong Papua Niugini, ol helt woka, ol sela na ol volantia.

MV YWAM PNG i go bek long Lae long wiken na neks wik bai em i statim raun bilong en i go long Sentral Provins.



Ol Luteran Sande skul pikinini bilong Pinake i amamas na singsing long taim bilong opim dispela rural etpos long ples bilong ol.

Nupela etpos long Pinake i op

WANPELA nupela rural helt etpos long ples Pinake, Menyamya long Morobe provins i op nau. Digicel Foundation i bin givim mani bilong sanapim dispela etpos long dispela ples longwe tru long hap bilong Menyamya.

Ol poto hia i soim seremoni bilong opim dispela nupela etpos bilong ol pipel. Seketeri bilong PNG Lo Rifom Komisin, Dokta Eric Kwa na Seketeri bilong Luteran Helt Sevis, Gesa Diringup i katim riben long opim Pinake Rural Helt Etpos. Digicel PNG Foundation i sanapim dispela etpos.

Meri Madang i nupela edita bilong Wantok

WANTOK Niuspepa i gat nupela edita. Ol Bod ov Dairekta bilong Word Publishing, i tokaut long dispela wik olsem Frieda Kana em i nupela edita bilong Wantok Niuspepa. Wantok i wanpela Tok Pisin niuspepa tasol bilong kantri, i bin stat long Ogas 1970.

Frieda Kana i bin stat wok long Wantok Niuspepa long 2013 na i kamap wanpela senia ripota na namba tu edita insait long 3-pela yia.

Em i kisim ples bilong Veronica Hatutasi husat i ritata long mun Janueri bihain long em i wok moa long 20 yia long Wantok.

Frieda i greduet na kisim Diploma long Not for Profit Manesmen long Auckland Yunivesiti na em i gat Diploma bilong Komyunike-



Misis Frieda Sila Kana em i nupela edita bilong Wantok Niuspepa. Poto: Wantok fail poto

sen Ats long Divine Word Institut, nau ol i kolim Divine

Word University.

Em i gat 20 yia eksperiens long wok bilong Komunikesen na Midia na intenesenel midia wantaim World Vision we em i wok 3-pela yia. Em i bin wok tu wantaim Australian Churches Partnership Program.

Em i gat eksperiens tu long wok wantaim ol Sios na Sivil Sosaiti na midia long kantri. Em i holim wok bilong Seketeri bilong PNG Media Council long 2015 i kam inap nau.

Misis Kana i bilong Manam ailan long Madang provins. Em i marit na i gat 4-pela pikinini.

Em i namba tri meri edita bilong Wantok Niuspepa, bihain long Anna Solomon, na Veonica Hatutasi.

Save na Mekim

Sapta 2

...moa yet long hap 1 (SAKSAK)

Kaikai bilong givim strong

SAKSAK

Mekim wanem long saksak

Saksak em i no gutpela kaikai tumas long helpim bodi. Saksak em i gat stas tasol, em dispela samting bilong givim strong nating long bodi. Tasol i no gat protin, em dispela samting bilong helpim bodi i kamap bikpela. Na i no gat vaitamin, em dispela samting bilong was long sik. Olsem na sapos yu laik kaikai saksak nating, em i no gutpela tumas bilong helpim bodi. Sapos yu tanim saksak wantaim kumu o pis o mit samting, o sapos yu tanim wantaim skrap kokona, em i gutpela.

Sampela pikinini ol i laik kaikai saksak nating oltaim. Kain olsem bai pikinini i no inap kamap gut. Long wanem, em bai i sot tru long protin na bai em i no inap kamap gut.

I gat kain kain rot bilong kukim saksak. Kukim long wara. Karamapim long lipa na kukim. Kukim long paia. Mumuim. Praim long praipan wantaim liklik gris.

Narapela rot gen i olsem: Putim drai saksak long wanpela dis. Hatim wara long sospen. Taim wara i boil, kisim na kapsaitim i go long saksak na tanim hariap na saksak i kamap malmalu.

Saksak wantaim kumu

Kisim samting olsem:
4-pela kap drai saksak,
1-pela drai kokonas.
Bin, tomato, kumu, anian.
Lip bilong karamapim.

Wokim olsem:

Brukim drai na putim wara bilong en long wanpela plet.

Skrapim kokonas.

Katim tomato, bin, anian na kumu. Nau bungim skrap kokonas, na olgeta kumu, na saksak long bikpela dis na tanim long han. Tanim pinis, kapsaitim sampela wara bilong drai i go long em, na tanim moa, inap saksak i holim pas olgeta kumu na skrap kokona. Nau karamapim long lip na kukim long paia.

Pasto Jonati Metu em i nupela ELCPNG Kate Distrik Presiden

Joyce Huanjo i raitim

EVANJELIKAL Luteran Sios bilong Papua Niugini i makim Pasto Jonati Metu olsem ELCPNG Kate Distrik Presiden long wik i go pinis.

Sios i holim dispela instolesen seremoni long ai bilong 300 o moa pipel insait long distrik long Johannes Flier Memorial Luteran Sios long Heldsbach, Fischaffen Distrik.

ELCPNG Het Bisop Rev. Jack Urame i putim Pasto Jonati Metu olsem nupela Kate Distrik Presiden na Pasto Erena Waraga olsem nupela distrik Gutnius dairekta.

Pastaim Distrik presiden na Saplin bilong Braun Rurel Haus sik, Reveren Kelly Rabisung husat i go pas i tok strong long yuniti na wok bung i mas i stap long karim aut wok bilong autim Tok bilong God.

Reveren Rabisung i givim wanpela plet, na wanpela kap na pul i go long nupela presiden na askim em long yusim pul olsem tul long stiaim em long lukautim ol 78,000 Kate Kristen pipel insait long taim no gut taim solwara i bagarap.

Em i soim mak olsem plet na kap olsem i gat wanpela plet na kap tasol we ol Kristen i bung na kaikai na dring

insait long bilip bilong sios.

Long dispela taim, pastaim Gutnius dairekta Revren Fuatone Mesere i salenisim distrik long go pas olsem mama long ol arapela 16 ELCPNG distrik insait long Papua Niugini.

Revren Mesere i tok olsem, Kate distrik i mas kamap ples klia gen long ol arapela ELCPNG distrik i luksave, long wanem em i stap insait long hap we histori bilong Luteran Sios i bin stat na sanap nau.

Em i tok moa olsem dispela em i graun na ples we Tok bilong God ol misineri i karim i kam na planim na

autim bipo long ol i karim i go long ol arapela 16 distrik bilong Luteran Sios insait long Papua Niugini.

Kalasa na Sattleberg seket tu i bin givim ol presen na kaikai long soim amamas bilong ol i go long ol visita na sios lida husat i kisim singaut bilong mekim dispela wok na tok amamas tu long nupela presiden na Gutnius dairekta.

Dispela tu i makim namba wan opisal lukluk raun bilong Het Bisop Urame i go long Kate distrik taim em i bin kisim posisen bilong en olsem het bilong sios long Janueri 2016.

NRL ROUND 5

31st March 2017 at 1300 Smiles Stadium, Townsville



FROM **K2,410***
PER PERSON / TWIN SHARE

3 Nights package includes:

- Return airfares Port Moresby to Townsville
- 3 nights accommodation
- Full buffet breakfast in Celsius restaurant
- Return airport transfers
- Return transfers from hotel to stadium
- Game ticket
- All travel taxes and surcharges



Air Niugini
www.airniugini.com.pg



Call Toll Free on **180 2121**
for more information.

* Strict conditions apply. Valid for 31 March to 2 April 2017 only.

Namba wan Sentral Sinot Haus i sanap bun nating yet



STORI TASOL
wantaim
Fr Paul Liwun

LAIP I SOT

Tude mi stori long wanpela pren bilong mi. Em i stap long Waigani tasol olgeta de em i go kam long wok long Koki Maket.

Wanpela moning em i senisim bas long Boroko na i go daun long Koiki. Taim ol i kamap long bas stop long 2-mail hil i gat wanpela traipela mama i kalap na em i karim planti samting i go salim long Koki maket. Em i kamap na kisim ples klostu long pren bilong mi. Pastaim dispela traipela meri i putim kago bilong em i antap long sia na i pusim i go i go na mekim pren bilong mi i no gat bikpela ples moa long sindaun gut. Em i pasim tru pren bilong mi wantaim ol kago beg bilong em na bihain traipela meri i sindaun long liklik spes bilong sia olsem na ples i pas pas tru.

Wanpela yangpela man i sindaun long baksait sia bilong pren bilong mi i tokim pren bilong mi olsem: "Yu mas komplem i go long dispela traipela meri olsem yu i stap pas tru wantaim kago bilong em. Tokim em long rausim kago bilong em olsem na yu bai stap fri long sindaun".

Tasol pren bilong mi i bekim tok bilong em: "Maski long komplem! Rot bilong mi i klostu pinis. Long narapela bas stop mi bai go daun. Olsem na i no gat nid long komplem".

Tasol dispela man i no amamas long harim bekim bilong pren bilong mi na tokim pren bilong mi gen long komplem long dispela patpela meri. Bikos em i pilim sori long pren bilong mi. Maski em i askim em gen na gen tasol pren bilong mi givim wankain bekim. "Mi ting i no gat nid long tok kros na arguim wantaim em long dispela liklik samting. Wokabaut bilong yumi i sotpela pinis. Mi bai i go daun long narapela bas stop i no stap long we moa"

- Em i wanpela sotpela stori tasol i gat naispela skul bilong em long yumi. Laip bilong yumi antap long dispela graun i stap sotpela taim tasol. Olsem na no ken westim taim long kros na wokim tok pait wantaim narapela.
- Nau em i taim bilong lainim, long mekim yumi redi long Ista. Yumi askim yumi yet; hamas manmeri i bin mekim bel bilong yumi i kros? Hamas taim yumi i bin belhat na tok kros wantaim ol? Taim wanpela i mekim yu kros, inap yu stretim kros wantaim kros bilong yu long em?
- Yumi olgeta i laik amamas long laip bilong yumi. Olsem na yumi mas soim rispek i go long narapela, narapela na redi long tok sori long narapela, narapela tu.
- Sapos mi bin mekim samting rong long yu, plis, pogivim mi. Sapos yu bin mekim pasin no gut long mi, nau mi pogivim yu.
- Laip bilong yumi i sot. Yu tasol inap long mekim laip bilong yu i kamap naispela o nogat!

Joyce Huanjo (Lutheran Communications Media)

TOK promis long kamapim wanpela sinot haus bung bilong Evanjelikal Lutren Sios bilong Papua Nuigini, long Heldsbach insait long Finsafen, Lae, i no bin kamap long mak olsem gavman bilong em i tok.

Dispela haus sapos ol i pinis inap kisim mak mani olsem K10 milen kina olgeta.

Ol pipel insait long Heldsbach wantaim tu ol arapela Lutheran kristen i laik save bilong wanem as na dispela haus i no pinis.

Pastaim Distrik Administrata bilong Braun Helt senta Manasse Katur i tokim Lutheran Kominikesen tim olsem ol pipel i paul olgeta long wanem as na gavman bilong em i no bin bihainim tok promis bilong en na lusim dispela haus i sanap bun nating longpela taim.

Mista Kafur i tok ol bin gat bikpela amamas tru taim ol i harim olsem ol bikpela bung bilong sios olsem sinot na ol arapela bung inap kamap long



Haus lotu sanap bun yet.

Heldsbach sapos haus i pinis.

Em i tok moa yet olsem dispela em long wanem Kate Dirrik i gat bikpela histori long sait bilong sios na wok misin insait long Lutheran sios.

Pasto Mark Anau husait i bin stap insait long brukim graun seremoni nambawan taim long yia 2015 i tok Hoim Builders i bin winim kontrak long wokim dispela haus.

Pastor Mark i tok Menesa bilong Hoim Sait Konstraksen i bin mekim tok promis long pinisim dispela haus bipo long 2016 ELCPNG nesenol sinot tasol dispela i no bin kamap.

Pasto i tokaut tu olsem gavman i bin tok long wokim dispela haus wantaim mak mani olsem K10 milen kina.

Taim Lutheran Komyunikesen Tim i go insait long lukluk raun

long hap i no gat sain bilong wanpela wokman o masin i stap.

Dispela i soim olsem ol wokman i kisim samting na lusim ples pinis.

Wankain taim ol pipel i nau singaut i go long gavman long i mas pinisim wanem samting ol i promisim sios na pipel bilong en.

AGM bilong Federesen bilong ol Relijes bilong PNG na SI

OL lida bilong Katolik Relijes Oda bilong Papua Niugini na Solomon Ailan i bin bung long Enuel Jeneral Miting (AGM) bilong ol long Alexishafen, Madang long Mas 4 i go inap long Mas 11 2017.

Wanpela hap bilong miting em long skelim tingting we i kamap long wanpela bikpela pepa bilong Pop Francis 'Laudato Si - Care for our common home', long lukluk long ol sindaun bilong ol relijes laip long PNG na Solomon Ailans.

Insait long miting ol memba bilong Federesen i bin bung wantaim Embeseda bilong Pop long PNG na Solomon Ailans, Asbisop Kurian Mathew Vayalunkal, na em i strongim ol lida long kamap piksa bilong ol narapela lain i bihainim ol na kamap witnes long wanem hap ol i stap. Em i toktok long ol hevi bilong stap insait long Relijes laip na komyuniti bilong ol.

Wanpela maus man bilong Federesen bilong ol Relijes i tokim Embeseda bilong Pop olsem ol i sanap wantaim Pop long tingting bilong em long ol hevi bilong bagarap i save kamap long ol ol bus wara na graun na tu long ol pipel long ol sosaiti husat i no inap long helpim ol yet.

Dispela maus man i tok moa



Grup poto bilong ol Federesen bilong ol Relijes i kamap long AGM long Madang.

olsem ol graun bilong PNG na Solomon Ailan, maunten na solwara em i bikpela samting na ol man i mas lukautim gut na no ken bagarapim. Taim ol i save rausim ol diwai nating long ol bus na kisim olgeta pis long wolwara na yusim tumas graun long planim ol samting bilong kisim mani we i save bagarapim gris bilong graun em i bagarapim samting God yet i kamapim.

Long bipo taim em i orait long tromoi ol hap kaikai o pipia bilong kaikai tasol nau em ol kain kain samting i save pundaun nabaut na bagarapim graun. Em i save mekim ol rot i luk doti na ol wara i save

gat planti pipia i pasim na bagarapim graun God yet i bin kamapim.

God i givim ol graun long yumi PNG na Solomon Ailan na yumi mas lukautim gut na givim i go long ol tumbuna lain bilong yumi long bihain taim. Sapos yumi long lukautim envairomen nau olsem pepa bilong Pop Francis i tok, em wankain we tasol bai yumi no inap long lukautim ol komyuniti bilong yumi, famili bilong yumi na ol wantok lain bilong yumi.

Olgeta samting i save gat kost bilong en. Sapos yumi wok long kamapim developmen na gutpela sindaun yumi

mas painim wanpela namel tingting long yusim tasol ol samting yumi nidim na i no ken pinisim olgeta na yumi no larim wanpela samting i stap bilong bihain taim.

Olsem na bilong kamapim sastenebel laip long bihain, gavman bilong yumi i mas painim ol rot long kamapim ol pawa we i no inap pinis, kain olsem ol haidro, win na sola.

Ol pipel bilong Melanesia olgeta taim i save gat strongpela wanbel laip wantaim graun bilong ol. dispela em i kantri bilong yumi na kalsa bilong yumi. Ol holi ples em yumi mas lukautim gut bilong bihain taim tumbuna lain.

Kopi bisnis i kisim taim nau

KOPI em i wanpela bikpela egrikalsa bisnis i save pulim bikpela mani tru i kam insait long kantri.

I gat moa pipel long Hailans rijon i save strong long kopi long kisim mani. Na i gat ol bikpela kopi bisnis tu i stap long ol provins olsem Westen Hailans, Jiwaka, Isten Hailans na long ol hap bilong Morobe tu.

Tasol long dispela wik, bikpela tok save i kamap olsem wanpela sik nogut i kamap nau long ol diwai kopi.

Wanpela liklik binatang ol i kolim kopi beri bora i wok long bagarapim ol kopi diwai na seri.

Minista bilong Egrikalsa i putim pinis tok save long Gavman Gaset olsem Jiwaka, Westen Hailans, Simbu, Isten Hailans, Enga na Sauten Hailans Provins em ples we dispela sik i stap nau.

Minista i tok save long bikpela tambu tru long muvim ol kopi seri na grin bin we i no drai yet i go long ol ples we i no gat dispela sik i kamap yet.

Dispela oda bilong gavman i tokim ol fama long rausim olgeta kopi bin na diwai i gat sik long en long ol eria we sik i stap long en.

Sif Inspekta bilong ol Plen bai i gat pawa long mekim wanem kain wok em i mas mekim long stopim dispela sik i kalap i go long ol narapela hap long Hailans yet na ol arapela hap bilong kantri.



I gat ol pablik tok save i kamap pinis long niuspepa na long redio tu long tok save long dispela sik nogut.

Orait ol pipel i mas harim tok na bihainim oda bilong gavman. Sapos yu lukim sik i kamap long diwai kopi bilong yu, orait yu mas rausim na kukim diwai na rausim ol kopi seri na drai kopi yu kisim

long ol dispela diwai. Sapos yumi no bihainim dispela tok save bai dispela sik inap long bagarapim olgeta kopi diwai long kantri.

I bin gat ol sik nogut i kamap bipo na givim bikpela hetpen tru long gavman wantaim ol kopi fama na kopi indastri long kantri bipo.

Gavman i putim strongpela

banis tru long stopim sik i go aut long ol arapela provins we kopi i gro. I bin gat bikpela wok tru na bikpela mani i lus long stopim dispela sik. Tasol planti ol famili i lusim kopi na planim ol arapela kaikai.

Sampela i larim bus i kamap karamapim gaden kopi na i no bisi moa, ol i painim narapela rot bi-

long kisim mani.

Nau dispela bikpela hevi i kamap gen na gavman i tokim ol opisa bilong NAQIA na Egrikalsa long mekim wok painim aut long as bilong dispela sik na ol rot bilong stopim sik i kalap i go long narapela hap.

Long kain taim olsem planti askim i save kamap long wok bilong egrikalsa ekstensen.

Bipo i bin gat ol ekstensen opisa i save raun na lukim ol fama na tokok wantaim ol.

Ol kain lain olsem bai inap long luksave hariap sapos sik i kamap long ol kes krop olsem kopi na givim ripot.

Dispela kain sevis i stap yet o nogat? I luk olsem ekstensen sevis bilong ol didman em samting bilong bipo na tude i no gat moa.

Tude prais bilong ol marasin na fetilaisa na ol konsalten tu i antap tru.

Planti ol fama i no inap long baim ol dispela samting olsem na sapos ol i lukim sik i kamap long diwai kopi, ating bai ol i no inap mekim wanpela samting. Dispela em sampela samting bilong skelim na stretim.

Tasol nau, i mas gat tok save tu long olgeta hap we ol fama i groim kopi.

Ol i mas harim tok na rausim ol sik diwai na no ken hait na salim ol drai kopi o wet bin ol i kisim long ol sik diwai.

Lukautim busgraun, wara bilong yu!

BUSGRAUN, wara i laip. Bagarapim na laip bai bagarap.

Em bikpela bilong tok ol opis olsem Klaimet Senis na ol envairmentalis long manmeri.

Dispela i min ol manmeri i no ken katim ol diwai nating o givim tok orait long ol timba kampani long katim diwai bilong ol.

Bikos long diwai manmeri na ol abus i gat gutpela klinpela win long pulim na stap.

Taim no gat diwai, no gat klinpela win olsem win nogut i bagarapim laip.

Moa long dispela, bipo long waitman i kam na bringim mani na kamapim nupela rot bilong stap, ol tumbuna bilong mipela i stap long strong bilong busgraun na wara.



Busgraun na wara i gaden kaikai bilong ol. Ol i no wet long ol i mas gat mani long go long stua na baim samting. Nogat.

Wankain sindaun em planti manmeri long bus ples i wok long bihainim yet.

Planti manmeri bilong nau i tok ol i tok orait long ol kampani long katim diwai bilong ol bikos ol i laikim mani, sevis na laikim senis long sindaun bilong ol olsem rot, haus sik na skul.

Dispela i ken trupela tok taim gavman i no bringim sevis i go long ol. Em wok bilong gavman long bringim sevis.

Tasol manmeri i no ken yusim dispela eskus long givim tok orait long kampani long givim bikpela hap bus bilong ol long katim diwai.

Em i tru timba kampani i ken bringim sevis tasol wanpela i mas save dispela kain sevis bai stap yet taim kampani i pinis wok o no gat. Ekspiriens i lukim planti bilong dispela ol sevis i pas o pinis taim kampani i pinis wok.

Long dispela as Skelim Tingting i kisim dispela taim long askim gavman long em i mas go het yet long strongim pablik-praivet patnasip (PPP) pro-

gram.

Olsem we em i sot long bringim sevis, kampani i ken helpim.

Planti ol sevis olsem rot, haus sik, skul, pawa, wok bisnis na klinpela wara i no go long manmeri bikos gavman i no inap kamapim.

Taim manmeri i no kisim sevis ol i lukluk long ol arapela rot olsem givim tok orait long ol timba kampani long go katim diwai bilong ol. Dispela planti taim ol i save bagarapim nating busgraun na wara bilong ol manmeri.

Laip bilong manmeri i bagarap moa long taim busgraun i bagarap.

Bihain long kain ol samting i kamap bikpela as tok em manmeri i no ken givim tok orait long ol timba

Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantokniuspepa.com

Pe bilong wanpela yia
52 niuspepa

| Ples: | Air: |
|-----------------------|------------|
| PNG | K220.00 |
| AUSTRALIA | US\$110.00 |
| ASIA PACIFIC na JAPAN | US\$150.00 |
| AMERICA na EUROPE | US\$210.00 |

General Manager
Elizabeth Konga

Editor
Frieda Sila Kana

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Pinisim laik bilong em long PNG

Sister Pierrtte Gagnon tok gutbai long PNG

Nicky Bernard i raitim

WANPELA longtaim Katolik Sister i lusim Papua Niugini long pinis bilong mun Februeri long go bek long ples bilong em long Canada bihain long em stap 50 yia olgeta.

Sister Pierrtte Gagnon i skul long wanpela komyuniti skul long ples bilong em long Canada, long skul sampela Katolik lain bin raun long skul bilong em long mekim wok misin. Dispela i putim tingting bilong Sister Pierrtte long kamap wokmeri bilong Katolik Sios. Taim em i pinis skul em i go stret long skul bilong kamap sister.

Sister Pierrtte i stap insait long kolis na taim em i pinis na kamap sister, ol makim em long kam long Papua Niugini long statim wok misin bilong em.

Long 1966 em kam kamap long PNG, taim em kam ol i salim em go long Westen Provins long het opis bilong ol Montford. Dispela taim ol save kolim ol Montford Sisters, nau ol kolim ol Dota ov Wisdom, long hap ol salim em long go mekim wok tisa long wanpela rimot ples long Midel Flai ol kolim Boset.

Dispela wok tisa bilong em i senisim dispela liklik komyuniti long Boset, dispela ples em no gat sevis i save go long en. Tasol Sister Pierrtte i wok long lainim ol pikinini wantaim ol bik manmeri bilong dispela rimot ples. Em tok ol ples lain i no save long Tok Pisin na Inglis. Tok pisin tu em ol i no lainim tumas long wanem ol Papua i les long join wantaim ol Niugini olsem na i hat liklik tasol ol i lainim long Motu.

Sister Pierrtte i stori long taim em stap long Boset ples ol Pater save kisim ol piksa muvi long ril kam na soim ol ples lain.

"Dispela wanpela piksa muvi em mas 10 or 20 taim olgeta mi lukim wankain piksa tasol bikos i no gat narapela muvi bai mipela soim long ples lain, olsem na dispela sem muvi mi bihainim Pater go long wanem liklik ples ol bai soim dispela muvi tasol bikos i no gat moa". Sister Pierrtte i lap na tok.

Long 1973 em kamap olsem komyuniti eduken(CODE) dispela wok bilong em mekim long wanpela yia tasol na long 1974 em kamap Eduken Seketeri long Daru. Dispela taim Inglis na Tok Pisin i no strong long Westen Provins olsem na ol save tok Motu liklik long lainim ol. Dispela wok seketeri em mekim 3 yia olgeta.

Long 1977 em i kamap olsem sosol woka o volentia long wanpela liklik sip. Dispela sip save karim ol stua kago go insait long ol liklik ples long Westen Provins. Taim em go sua long liklik ples Sis-



Sister Pierrtte wantaim ol Montford Sister.

ter save go na givim trening long ol ples lain long kamap olsem medikol opisa long liklik ples bilong ol. Dispela liklik sosel wok o volentri wok em mekim long 12-pela yia olgeta insait long Westen Provins.

Long 1988 ol i makim em long kamap Jenerel Kansola ov Jenerel long Rom na em go bek long Rom long mekim dispela wok.

Em pinis long Rom long 1994 na em kam bek na go stret gen long Westen Provins gen. Dispela taim em go stap long Matkani Stesin long Haiwe bilong Tabubil na Kiunga. Dispela stesin i nogat Pater long hap so em kamap was meri long dispela stesin. Long dispela hap em i mekim wankain wok bilong em long lainim ol manmeri na pikinini long hap.

Long 2000 ol i makim em kamap wokmeri bilong Callan Sevis, na dispela wok nau i mekim em raun liklik long ol 19 Sevis senta insait long PNG.

Dispela wok bilong em i go strong moa yet na em opim sampela nupela sevis senta long Daru na Ninigerum loing 2005 na mekim go 3-pela sevis senta long Western Provins.

Dispela wok bilong em i kisim em longpela taim long inap long 14 yia olgeta olsem het bilong Callan Sevis.

Long 2015 na 2016 Bisop bilong Kiunga Daiosis i singautim em long kamap Seketeri bilong Daiosis bilong Kiunga Daru na stretim olgeta pepa wok bilong daiosese na akaiv bilong ol Montford Sister.

Dispela yia 2017 em 51 yia bilong em long wok insait long Papua Niugini na em i tingting long go bek long ples bilong em Canada na ritaia olsem Montford sister.

Em i tok taim em i kam long PNG em mekim namba bilong ol Canada Sister go 54 na olgeta bin

Canada Sister long lusim PNG na Westen Provins.

"Mi em las sister i kam long Canada na mi bai pasim olgeta Canada sister husat kam pas na kam bihain long mi. Olgeta go bek pinis long Canada, mi tasol mi stap bek na pinisim olgeta wok mi laik mekim so mi mas lusim Papua Niugini na ples bilong mi Westen Provins na go bek long ples mama karim mi long en. Mi stap strong yet na mi mas go. Mi bin gat 25 krismas na mi kam long Westen Provins o PNG na nau mi gat 76 krismas na go lapun liklik tasol mi strong yet na mi mas go bek long ples. Wanem hevi painim mi, mi stap pinis long ples long Canada," Sister Pierrtte i krai na tok.

"Nicky, mi lainim liklik Tok Pisin tasol taim mi go long Westen Provins Tok Pisin i lus long het bilong mi long wanem ol lain long Westen Provins i no save long Tok Pisin. Nau tasol liklik go insait long

ol long wanem Papua i bung wantaim Niugini, taim mi kam ol i no bin bung gut" Sister Pierrtte i lap na tokim man i raitim stori.

Taim em kam long Mosbi na redi long flai go long Canada, ol manmeri na pikinini long St Martin De Porres long Morata i mekim las misa wantaim em long wanem St Martin De Porres em hap han bilong ol Montford long Kiunga. Bihain long misa olgeta manmeri na pikinini tok gut bai long Sister Pierrtte na tenkyu long em long mekim bikipela wok long PNG.

Sister Pierrtte bai lusim PNG na go stap tupela wik long Australia na bihain bai flai 16 aua long balus go long West Canada na bihain 6 aua go long ples bilong em long East Canada we em bai malolo wantaim ol famili bilong em.

Sister Pierrtte em sekan las long famili bilong 8, em na bikipela susa bilong em i kamap Sister bilong Katolik sios.

Sister Pierrtte Gagnon wantaim billum bilong em.

Poto: Nicky Bernard



Wokabaut bilong kamapim gutpela Wok

Nicky Bernard i raitim

NASFUND i kamapim wanpela wokabaut long las wik Sarere wantaim olgeta wok manmeri bilong em long Varirata long Sogeri Mauten autsait tasol long Mosbi Siti.

Dispela ritrit wokabaut em long mekim ol wok manmeri long save long ol yet na wanem wok ol i save mekim na tu long soim wanem samting ol i ken mekim long helpim ol kastoma na memba bilong ol.

Ol wok manmeri bilong

Nasfund i bin kirap long hap pas 5 long bik moning na kalap long haia bas na go antap long Varirata long Sogeri. Taim olgeta kam bung, wokabaut i stat long 7 klok na pinis long 11 klok long moning yet.

Dispela wokabaut i soim ol long wei bilong wok namel long ol na ol memba bilong ol, na wankain wokabaut olsem long opis bilong ol yet.

Dispela wokabaut i no longpela tumas tasol ol manmeri bilong Nasfund i amamas tru long dispela lik-

lik wokabaut bilong ol long soim, we ol i stat, we ol i stap, we ol i nid long go na wanem wei bai ol i go long pinis lain. Dispela i wankain tok em bai ol i mekim long opis taim ol i wok.

Ol yet i wok bung wantaim na kamapim dispela wokabaut bilong ol long Sarere na pinis wantaim stail.

Planti ol mama na papa i bin kisim taim liklik long wokabaut tasol ol i strongim ol yet na i go long pinis lain.

Nasfund i kamapim miting bilong ol menesa bilong ol

namel long wik na taim miting i pinis olgeta menesa tu i gat sans long wokabaut long dispela ritrit wokabaut.

Planti ol yangpela wok manmeri i bin amamas long dispela wokabaut long mekim ol stap strong na tu stap wantaim ol bos manmeri bilong ol.

Nasfund i tingting long mekim dispela ritrit wokabaut long olgeta yia long strongim ol wok manmeri bilong ol na soim ol gutpela rot long lukautim ol kastoma na memba bilong ol.



TORO



BIABIA



KANAGE



Ol Yunit long Rainbow i stap long Rent!

I gat haus bilong rent i stap long Rainbow Estate Seksen 506, Lot 60 na 61 – Word Publishing Kampani Kompaun.

Long Rainbow Estate nau i gat 5-pela tripela betrum haus i stap fri long rentim. I gat bikpela banis na sekyuriti geit na lait i stap.

Prais bilong rentim em K4,000 tasol long mun.

Planti mango diwai, plawa na planti gutpela klinpela win.

Plis ringim Buana Ragela o Elizabeth Konga long telepon namba 325 2500 long toksave.



AUTIM TINGTING

Dia Edita,
Mi no amamas long taim mi ritim long Wantok niuspepa osem taim Memba bilong Sandaun Amkat Mai i askim minista bilong Sivel Eviesen, Davis Steven. Kantri i gat 22 setifait ples balus tasol bilong wanem na Taji Ples balus long Aitape Wes Sepik Provins, gavman i no inap stretim. Minista Steven i tok osem Taji ples balus i no i stap long lista long stretim na taim mi ritim dispela stori mi no amamas tru long Minista Pruaitch em memba bilong Aitape/Lumi Open. Em sapos long stretim Taji ples balus na Aitape Wof na Aitape/Lumi Rot na sensisim Aitape taun tasol em i no mekim wanpela samt-ing long Aitape taun.mipela makim em 15 yia nating tru tasol em i no mekim samt-ing stret. Osem na olgeta manmeri long Aitape/Lumi Open no ken makim Minista Pruaitch long 2017. Em i mas lus long dispela yia.

Kambotu Lopex. Aitape, Wes Sepik.

STORI BILONG TUMBUNA

BEKIM SIKAU

Long wanpela liklik ples ol i kolim Dukutam, wanpela meri tasol i save stap. Em i gat wanpela liklik pikinini man i bebi tru.

Long wanpela taim, em i taim bilong pikinini bilong diwai i mau na i pundaun. Na meri ya em i ting long kisim sampela long bus. Na em i karim pikinini bilong em na i go. Em i bihainim wara ol i kolim Urer. Long arere bilong wara em i lukim planti pikinini bilong diwai tru i pundaun na i stap. Em i tok: Mobeta mi hangamapim pikinini long sangana bilong wanpela palai. Na meri i wokabaut i go painim ol pikinini bilong diwai na i go longwe moa.

Tarangu, lek sangana bilong palai i tait nogut tru, em i singaut: "Hey, yu meri kam kisim pikinini bilong yu. Lek bilong mi i pen nogut tru ya. Nogut mi lusim em na i pundaun na i dai." Tasol meri ya i no harim.

Wanpela Sikau, em i boinim skin bilong em long san i stap. Na em i harim palai i singaut i singaut i stap. Na Sikau i ran isi i go, na kisim pikinini na i ranawe i go long bus.

Sikau i lukautim pikinini long bus, inap pikinini i kamap bikpela boi na em i soim ol kain samting long em. Olsem tamiok, banara, paia, na naip. Sikau i bin raun i go stilim long ol man. Olsem olgeta samting boi ya i gat. Nau boi ya i wokim wanpela haus bilong tupela, na gaden tu.

Long wanpela taim Sikau i raun i go na em i painim ol yangpela meri i wok long painim pis long wara i stap. Wanpela liklik brata bilong ol tu i go wantaim ol.

Orait, Sikau i kalap kwik na i stilim purpur bilong namba wan meri, na em i ranawe. Tupela meri i kamaut long wara na i ran bihainim Sikau i go. Na tupela



meri i salim brata bilong ol i go bek long ples. Tupela meri i bihainim sikau i go na maritim dispela boi ya sikau i lukautim long en.

Ol lain papamama bilong meri ya i salim liklik boi go bek long bus na painim tupela susa. Tarangu liklik boi i go na em i painim tupela susa i maritim pinis long man na i stap. Na long moning tupela meri wantiam man bilong ol i kilim wanpela pik givim long liklik boi ya na salim em i go bek long ples.

Sampela ya i go pinis, na i gat bikpela pati i laik kamap long ples bilong tupela meri. Na tupela papamama bilong tupela meri i salim tok long kisim pe bilong tupela pikinini meri i maritim long man long bus. Na liklik brata bilong tupela meri i salim tok long Sikau. Sikau em i mama bilong man bilong tupela meri.

Orait de i klostu pins na ol i kirap i go long pati. Orait, tupela meri i pasim lek han bilong Sikau na pulimapim em

long bilum. Na man bilong tupela i no save long sikau, tupela meri i pulimapim, haitim tru na karim i go.

Taim bilong pati nau, long nait bikpela singsing i kamap. Singsing i go inap long biknait tru, samting olsem 12.00 klok. Nau liklik brata bilong tupela meri ya, em i litimapim sikau, i go antap na em i tok: "Dispela Sikau em i pe bilong tupela susa bilong mi. Mi laik kaikai nau." Na em i kisim naip na katim nek bilong sikau.


Tarangu, man bilong tupela meri em i lukim ol i kilim mama bilong em pinis. Olsem bel bilong man ya i nogut tru. Em i krai nogut tru. Long wanem, taim man

ya i bebi sikau yet i lukautim inap em i bikpela man na em i maritim. Orait, long nait yet man ya i ranawe i go bek long ples bilong em. Na long rot em i wokim wanpela bikpela hul tru i go daun moa. Na em i karamapim long lip diwai.

Bihain long pati ol man laik go bek long ples. Longpela lain manmeri i bihainim dispela rot i kam, olgeta i pundaun long dispela hul na ol i dai. Na long neks de man ya i go lukim na karamapim hul long graun gen. Dispela ples nau ol man i kolim nem olsem Bekim Sikau.

Bruno Malai Usino/Madang

Em nau! Ol pikinini i ken painim rot i go long ples wantaim wantok lain...



Yu pinis! Em ples bilong yu

Ansa bilong Wod Pilai isu 2216

Z T I D E G E Y I E C P C E F C D A J G S I Z S R
E G T E N R A N P C W L V S G P G Q K J U J V A D
I S O K E L E T F F O J N P J F M P L I E T R Z J
E I A A V C T C N N U V A S P R U E K E S S U T S
R N E F U O Z H K E I T Y I I E Y E F L E S A Q N
E S Q E N N E V M H S F S E C N L L S T Q I T W D
E O A L E E S A E S A I L S B T O T L F N M N H N
G D O H L H E D D B O N S I E G A Y M R S O I L D
P N E S H L T Y C A S X N I Q R H E Q A G J P T D
Y R S A R E W B Q K A C A S R T R T J K I R S G D
C B C N W E D S I K O E S O M R Q G V A N I B M B
L E W I S M A H T R G A J J D S S O R K W P R E Y
N N E F I E Y Q C U I M S W E X D T A Y A I G H
I U S Z I J P S S A A B I D F F R K L Y M R N R O
Q M E P P C C T P R N E N X Z S A R L A A A G T P
U P P S E E L L T I O A S G A L R L H R T L I K U
M G K K V E R B E X E O S R S G O M A L A I M C S
G D T C N M E V G G C Z B A R I N T I K E T A Y I
D S C C S A B U N H N J O L T P O D U C T U P I S
V T O M A B E I J J J B R E K I M S W I S I M D U

PAINIM WOD PILAI

- Ol wod lista: MEKPAS, SNEK, BAKSIP, KUSKUS, HAMAS, GOS, MAKAU, SITBET, WARA, DIS, PAM, LEVA, PRINTIM, GEL, TAMBARAN, YOT, PINISTAIM, NARAPELA, WAWAN, MALEO, TRAP

R N H Z G T S N X P S N M R V L I O I S E U L O M
L C A O E A T V I I E O A G R U R K S D U S P S E
N E T F Q Y K D Y E V W U N I C R L M N H M F J M
H I S Y N F U S O O O V G D P D E A L O R P I O R
S C O E A P S M K O H Z M W F E Y P A C A K R G S
N F I E N K K A K O T R J Q S G M R S E N V C I X
R G M I K A U J Y W I S E O T N A I P I T T B E T
S S Z S D Z S B W S V I C L S W D L L Y O R E X O
C F E E F A K R H E E E M R V E D J V O W C L N E
Y R N N M R K I E M N F D R R P R I N T I M B O W
T I S A L A E G I B J T O I K F D A A T P P Z E T
C S H J N Q C F O G L X W L A E R R R U I G R S A
Q I O N S E W O O K R U M Y E A T U A S N A N T O
R A A R M L R J I D K U O M B V R K P L I W E E D
F H R Y D A E Q S I T M W M R R A L E H S B E R K
E U E E N R I N A G E L A O C M P I L A T A D E G
R S W H E E C A A I O T W L A Z P R A I A K N T H
A B I I V M F I L C R A A Y E E E M S T I S E A N
P I D E W D R F M H H F N Q M O A O E A M I L R T
Z W S C M O H E C L T W M E D P G G M E K P A S R



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Vanuatu pilim pen bilong Saiklon Pam yet

John Papik i raitim

VANUATU i wok yet long ol program bilong stretim ples tupela yia bihain long strongpela saiklon i bin bararapim kantri.

Long dispela de long 2015 Vanuatu i bin bungim bikpela hevi tru Saiklon Pam i bin kamapim. Ol i tok dispela i bin wanpela strongpela na bikpela saiklon tru long kam long wanpela kantri long Pasifik. Dispela saiklon i bin kamapim wanpela bikpela bagarap tru long Vanuatu.

Samting olsem 15 pipel i bin dai na planti arapela i



Saiklon Pam i bin bagarapim Vanuatu long Mas 2015.

bin kisim bagarap. Planti haus bilong ol pipel, ol skul na ol arapela bilding i bin bagarap tu.

Long dispela anivesari bilong Saiklon Pam, Dairekta bilong Vanuatu Disasta Manesmen Opis, Shadrack Welegtabbit i tok tupela yia

bihain long Saiklon Pam, ol wok bilong stretim ol samt- ing i go het yet.

Em i tok ol gavaman dipatmen olsem Edukesen, Helt, Wara na Infrastraksa i mekim wok bilong ol long lukim olsem olgeta samting i stap gut

Bogenvil Red Cross bai statim Liklik Dokta projek

John Papik i raitim

I GAT tingting i stap nau long givim Fes Eid trening long ol skul pikinini long Papua Niugini na bai tu i ken helpim ol arapela pipel sapos bikpela birua i kamap.

Stanley Azagun husat i kodineta bilong Bogenvil Red Cross i tok long Bogenvil ol i makim pinis tupela praimer skul long statim dispela

program ol i kolim "Little Doctors".

Em i tok bikpela tingting insait long dispela program em long givim ol skul pikinini besik fes eid trening, disasta na imejensi, komyuniti autris program long mekim ol pikinini i save long fes eid sapos i gat bagarap i kamap.

Dispela program bai kamap tu long sampela Praimeri skul long Pot Mosbi.

Kisim Bek PNG: Oro Gavana i tok

Caroline Tiriman i raitim

GAVANA bilong Oro provins, Gary Juffa i tok ol pipel i mas kisim bek PNG. Em i mekim dispela toktok taim kantri i wok long redi long nesanel ileksen long mun Jun.

Juffa i tok ol pipel bilong Papua Niugini i mas sanap strong na kisim bek kantri bilong ol long lain husat i save salim nating graun long ol narapela pipel. Em i tok ol pipel i mas

sanap strong na planim ol kaikai bilong ol yet na lukautim helt bilong ol.

Gavana i askim tu ol pipel long no ken baim tumas ol kaikai i save kam long ol kantri long Asia we i pulap long ol kain kain kemikal.

Em i tok tu olsem PNG i no ken bihainim dispela Pacer-Plus wokbung bilong tred em Australia na Nu Silan i laik kamapim wantaim ol Pasifik Ailan kantri.

PNG Manus Gan Wari

Caroline Tiriman i raitim

PASIN bilong hensapim ol bot na pasindia long solwara long Papua Niugini i save fosim ol pipel bilong Manus provins long haitim ol gan bilong yusim sapos ol kriminal i mekim dispela pasin long ol taim ol i ran long solwara.

Memba bilong Manus Open long Palaman, Ronny Knight i mekim dispela toktok bihain long Manus Polis Komanda David Yapu i bin autim wari bilong em olsem ol pipel i wok long bringim planti ol gan na ol

drag i go insait long provins.

Long wik i go pinis, ol i bin painim ol gan em ol i bin haitim long ol beg buai long wanpela bot em i bin lusim Madang provins na ran i go long Manus Provins.

Mista Yapu i tok em i wari olsem dispela kain pasin bilong hait na bringim ol drag na gan em bilong kamapim hevi long nesanel ileksen.

Pasin bilong hensapim ol sip taim ol i ran long solwara i wok long kamap bikpela wari long ol provins long nambis long kantri.

Ol pipel bai no inap hariap long bihainim kava lo

Caroline Tiriman i raitim

DIPATMEN bilong Egrikalsa long Vanuatu nau i wok strong long skulim ol kava fama long planim ol gutpela kava na no ken planim ol rabis kava o 2 De Kava.

Dispela wok i stap aninit long ol lo em ol i bin amendim long 2016 bilong larim ol pipel i planim ol gutpela o Noble Kava em ol i ken salim tu i go long ol narapela kantri.

Kava indastri long Vanuatu i bin bagarap long 2015 bihain long Saiklon Pam na

bikpela san i bin kamap long kantri na bagarapim ol kava fam.

Planti kantri long tripela rijon bilong Pasifik, Melanesia, Maikronesia na Polinesia i save yusim kava long dring na tu, long ol taim bilong selebresen, tasol nau planti pipel bilong ol narapela kantri tu i save laikim kava.

Dr Vincent Lebot bilong Dipatmen bilong Egrikalsa i tokim Radio Australia olsem, maski i gat kava lo i stap, tasol bai longpela taim moa bipo long ol pipel i bihainim dispela lo.

Gold Ridge main i kisim bek laisens

Sam Seke i raitim

BIHAIN long em i bin westim nating 8-pela mun, Gold Ridge Mining Limited bai statim bek olgeta wok bilong kirapim bek gol main long Sentral Guadalcanal, Solomon Ailan.

Wok i stat gen bihain long gavman i givim bek Maining Lis laisens bilong kampani long Tunde. Gavman i bin kenselim laisens bilong dispela kampani las yia.

Gavman i tok em i bin kenselim laisens bilong kampani bikos em i bin brukim Mains na Minerals Ekt na Maining Agrimen taim em i lusim dispela main long Epril 2014.

Siaman bilong Gold Ridge Mining Limited, Walton Naizon i tok gavman i givim bek Maining Lis bihain long em luksave olsem

em i bin asua long kenselim.

Mista Naizon i tok kampani i bin kotim gavman na taim em i save olsem em i asua, gavman i stretim olgeta tok ausait long kot na givim laisens i go bek long kampani.

Minista bilong Mains, Eneji na Rural Ilektrifikesen, David Dei Pacha i sainim wanpela agrimen long Tunde na i givim bek Maining Lis laisens.

Mista Naizon i tok kampani na Gold Ridge Community Investment Limited husat i papa bilong kampani, i amamas long gavman.

Em i tok bihain long ol i bin westim planti taim, ol wok bilong developim main bai stat nau na ol i hop bai namba wan gol bar bai kam aut long pinis bilong 2018 o long begin bilong 2019.

Solomon Ailan i selebretim IWD

Sam Seke i raitim

HONIARA i bin lukim wanpela bikpela selebresen tru bilong amamasim Intenesenel Wimens De (IWD) las wik.

Planti ol wimens grup, ol gavman dipatmen, NGO, ol rijonal na intenesenel ejensi na gavman, ol meri, man na pikinini i bin stap insait long bikpela mas na ol arapela ektiviti bilong makim IWD.

Pemanen Seketeri bilong Ministri bilong Wimen, Yut na Pikinini, Ethel Sigimanu, i tok dispela bikpela selebresen i bin kisim bikpela sapot winim ol arapela i bin kamap bipo.



Solomon Ailan polis ben i go pas long mas bilong selebretim IWD long Honiara.

Het tok bilong 2017 Intenesenel Wimens De em "Be Bold For Change" na Ms Sigimanu i tok olgeta pipel i karim sans bilong kamapim senis.

Em i tok gavman tu i bin

kamapim ol senis long helpem olgeta meri na pikinini olsem dispela Famili Proteksen Ekt, Seksual Ofenses Ekt, na Pikinini na Welfe Ekt.

Australia i no toktok long Wes Papua wantaim presiden bilong Indonesia

Caroline Tiriman i raitim

OL pipel bilong Wes Papua i tok ol i wari tru olsem Paim Minista bilong Australia, Malcolm Turnbull i no bin toktok wantaim Presiden Joko Widodo bilong Indonesia long ol hevi bilong human raits long Wes Papua.

Tupela lida wantaim i bin tokaut long gutpela wokporoman bilong kantri bilong tupela bihain long

lukluk raun bilong Presiden Widodo long Australia long las wiken.

Mista Turnbull i tok Australia bai respektim ol intenel afeas bilong Indonesia olsem ol i bin tok orait long en aninit long Lombok Treaty.

Ronny Kareni em i wanpela Wes Papua Ektivis long Australia. Em i tok ol i wari olsem toktok bilong Paim Minista Turnbull i soim olsem Australia bai i no inap toktok long

ol wari bilong ol Melanesia pipel bilong Wes Papua.

Ol i sutim tok long Indonesia long bagarapim na kilim dai planti handet tausen pipel bilong Wes Papua.

Long Sande ol pipel bilong Wes Papua na ol sapota bilong ol i bin mekim protest mas long Sydney, na asde ol protes i bin kamap long Westen Australia na tu long Noten Teritori long sapotim ol pipel bilong Wes Papua.



Demonstresen long Sydney long sapotim Wes Papua.

Presiden Erdoğan i givim strongpela tok lukaut long Netherlands

PRESIDEN bilong Turkey, Recep Tayyip Erdoğan, i tokim Netherlands bai ol i "kisim taim" long wanpela bikpela kros namel long tupela kantri. Kros i kamap bihain long Netherlands i

stopim wanpela gavman minista bilong Turkey long go lukim konsulet bilong Turkey long Rotterdam. Bihain long dispela kros i kamap bikpela protes tu i kamap.

Erdoğan i tok dispela pasin ol i mekim long Fatma Betül Sayan Kaya, Minista bilong Famili, em i sem pasin na em i tok ol Dutch i "soim pasin bilong wanpela banana ripablik.

"Sapos yu ken bagarapim Turkish-Dutch rilesens bikos long ileksen i kamap long Trinde, bai yu pilim pen bilong en," Erdogan i tok long wanpela bung long Istanbul. "Mi ting pasin bilong ol nazi i pinis tasol mi popaia. Pasin bilong ol nazi i stap laip yet long west."

Em i singaut long ol intenesenel ogenaísesen long givim sampela mekim save long Netherlands tasol em i no tokaut wanem samting kantri bilong em bai mekim.

Praim minista bilong Netherlands, Mark Rutte, husat bai bungim bikpela salens tru long palamen ileksen long Trinde i tok Turkey i brukim lo bilong ol diplomat. "Dispela pasin i no bin kamap bipo, we wanpela kantri i tok nogat long wanpela lida tasol em i no harim tok na i kam insait long kantri." Em i toktok long disisen bilong Kaya long ran long kar i go long Rotterdam bihain long ol i stopim

wanwok bilong em Foren Minista, Mevlüt Çavuşoğlu, long flai go long Netherlands long Sarere.

Ol tupela gavman minista bilong Turkey i bin laik tok tok long ol pipel bilong Turkey husat i stap long Netherlands na planti bilong ol i gat dual sitisensip. Ol i laik tokim ol pipel long wanpela referendum neks mun long nupela lo bilong givim moa pawa long Presiden Erdoğan.

Gavman bilong Netherlands i tok nogat long tupela minista bikos raun bilong ol i klostu long taim bilong palamen ileksen. Dispela kros namel long tupela kantri i kamap bikpela moa nau na i karamapim kempen.

Na far-right lida Geert Wilders, husat i go pas long Freedom pati na ol i ting bai winim samting olsem 20 o 25 sit na inap kamap bikpela oposisen grup long Netherlands, i no amamas long

lukim ol plak bilong Turkey long ol strit long Rotterdam. Wilders, husat i kempen long rausim Islam long Netherlands, i tok long Twitter: "Netherlands i ken lukim olsem ol dispela pipel i bilong Turkey, ol i no Dutch. Ol i gat Dutch pasport, tasol ol i no bilong hia."

Dispela disput namel long ol Dutch na gavman bilong Turkey i kamap bihain long wankain hevi las wik namel long Turkey na Jemani. Long taim gavman bilong Jemani i stopim Çavuşoğlu long tok tok long Hamburg, Presiden Erdoğan i tok gavman bilong Jemani tude i wankain olsem ol nazi.

Praim Minista bilong Netherlands i tok, "Mipela i askim dispela minista long no ken kam bikos long ol hevi mipela i ting bai kamap long Rotterdam na mipela i no pilim gut long raun bilong em," em i tokim Dutch televisen.



Ol pipel bilong Turkey i bung long protes ausait long haus bilong konsulet jeneral bilong Turkey long Rotterdam.

Woa i bagarapim ol pikinini long Syria

OL pikinini long Syria i wok long painim bikpela hevi tru ol i kolim "toksik stres". Dispela i wanpela kain saikolojik troma inap bagarapim laip bilong ol long bihain taim tu. Wanpela wok painimaut o stadi i soim olsem namba bilong ol pikinini husat i bagarapim bodi bilong ol yet o i traim long kilim ol yet, i wok long kamap bikpela. Sampela bilong ol i gat 12-pela krismas tasol.

Wanpela ripot i kam long Save the Children na ol patna bilong en long Syria i soim olsem 5.8 milien pikinini i nidim helpim, bikos long woa. Neks wik bai woa long Syria i winim 6-pela yia.

Dispela ripot em i wanpela bikpela stadi tru ol i bin mekim long taim bilong woa, i tok mental helt bilong kantri bai wanpela bikpela hevi tru, tasol namel long ol pikinini bai inap kamapim bikpela bagarap tru long het bilong ol.

Moa long 70 pesen bilong ol pikinini ol i bin toktok wantaim, i soim mak bilong "toksik stres" o post-tomatik stres disoda, we ol i save pispis long bet. Samting olsem 48 pesen bilong ol manmeri i tok, ol i lukim sampela pikinini no save toktok moa, ol i kamap mauspas long taim woa i stat. Sampela i save belhat

na pait o ol i kisim drag. Nem bilong dispela ripot em Invisible Wounds.

Mohammed, wanpela aid woka wantaim Shafak, wanpela patna bilong Save the Children long Idlib, i tok ol pikinini i stap wantaim pret oltaim.

"Mipela lukim olsem ol i save wari oltaim na i save kirap nogut long taim ol i harim nois, kain olsem dua i pairap o sia i muv, bikos ol i save pret long nois bilong balus na ol roket. Ol pikinini i laik stap ol yet na i no laik pilai wantaim ol narapela na mipela i lukim olsem long taim ol liklik pikinini i save pret, ol i save pispis."

Firas*, papa bilong Saeed*, husat i gat 3-pela krismas, i tok, "Pikinini bilong mi i save pret na kirap nogut long nait. Em i save kirap nogut na singaut. Em i lukim wanpela pikinini i dai long ai bilong em olsem na em i save driman olsem wanpela man i kam long kilim em tu."

Planti bilong ol dispela pikinini i soim mak bilong "sivia imosenal stres" na 78 pesen bilong ol i stap wantaim wari na bikpela sori. Dispela stadi i glasim 458 pikinini, ol yut na ol bikpela manmeri na i bin kamap namel long Desemba 2016 na Februeri 2017, long 7-

pela bilong ol 14 provins bilong Syria.

Dispela stadi i soim tu olsem:

51% bilong ol bikpela manmeri i tok ol yut i wok long kisim drag long helpim ol i lus tingting long ol dispela hevi.

59% bilong ol bikpela manmeri i tok ol i save long ol pikinini na yut husat i joinim ol lain bilong pait. Hap namba bilong ol i save long ol pikinini husat i wok long ol sekpoin na long ol bareks.

Namel long 4-pla pikinini, wanpela bai i soim mak bilong kisim mental sik.

Samting olsem, 60 pesen manmeri i tok bikpela samting tru i bagarapim laip bilong ol pikinini, em ol i no inap go long skul moa.

Unicef i tok long taim woa i stat, i bin gat 4,000 atek long o skul long Syria.

Long dispela stadi, ol wokmanmeri bilong Save the Children, ol patna bilong en wantaim ol saikososal wokman, i bin toktok wantaim ol pipel i stap long hap we ol oposisen i bin holim. Ol ples olsem Aleppo, Damascus, Dara'a, Hasakah, Homs na Idlib.

Ol i no inap long wok long ol ples i stap long kontrol bilong gavman o ISIS, tasol ol i tok ol eksperiens bilong ol pikinini long ol dispela eria tu



Ol pikinini long al-Bab distrik long Alepo long 6 Mas. Ripot i tok 5.8 milien pikinini long Syria i nidim helpim.

bai i wankain. Bikpela namba bilong ol dispela pikinini i lukim famili bilong ol i dai, o bom i bagarapim haus bilong ol, o ol yet i bin kisim bagarap long dispela woa.

Long Madaya, we pait i stap long 2015 i kam inap nau, ol medikol wokman i tok 6-pela pikinini, yangpela tru em pikinini meri husat i gat 12-pela krismas, na 7-pela bikpela manmeri i bin traim long kilim ol yet, insait long tupela mun.

Olgeta pikinini na 84 pesen bilong ol bikpela manmeri, i tok ol i "gat strongpela tingting tru olsem ol i no seif" em i as bilong hevi i mekim ol pikinini i pret na wari oltaim.

Hala, wanpela tisa long Madaya, i tok, "Ol pikinini i tok ol i laik dai, na bai ol i go long heven we ol i no inap kol na ol i ken pilai na kaikai gut. Ol i laik bai wanpela

snaipa i sutim ol bikos ol i ken go long haus sik na lusim ples bilong pait bikos ol i ken kaikai long laik bilong ol."

Alexandra Chen, wanpela speselis bilong lukautim ol pikinini na mental helt speselis long Harvard University, i tok toksik stres em i wanpela mak nogut, long taim ol pikinini i stap longpela taim tru long ples woa i kamap na i no gat gutpela sapot bilong ol bikpela manmeri.

"Bai i gat kain kain hevi i kamap long laip bilong ol dispela pikinini long mental helt na long bodi bilong ol. Bai bodi na kru bilong ol i no inap long gro gut na lewa bilong ol tu i ken bagarap. Sampela bai i kisim drag na i gat sik long het long taim ol i kamap bikpela manmeri," Chen i tok.

Em i tok tu olsem long taim vailens i pinis na sapos i gat

gutpela sapot, bai ol pikinini i ken kamap orait gen.

"Tasol nau, mental helt bilong ol pikinini long Syria i bagarap tru olsem famili sapot na gavman sevis tu i pundaun olgeta."

Dispela ripot i singaut long pait i mas stop nau na ol i mas stop long yusim ol bom long ol eria we i gat bikpela populesen, ol skul na haus sik na larim ol pipel i fri long go kam long wanem hap ol i laik go long en.

Samting olsem 13.5 milien pipel long Syria, na 5.8 milien pikinini i nidim helpim, Save the Children i tok. Samting olsem 4.8 milien pipel i stap long ol eria we ol birua i banisim.

Samting olsem 250,000 pipel i bin dai na 4.9 milien, we 2.3 milien em ol pikinini, i ranawe lusim kantri. Planti bilong ol i go long Turkey, Jordan, Lebanon na Iraq.

Ramu NiCo BSK Rifaineri i strongim sefti



Ol Basamuk Rifaineri HSE i putim bena i toktok long proses sefti.

ASTINGTING bilong Ramu NiCo Basamuk Rifaineri long taim bilong Nesanel Maining Sefti Wik long Madang em, Managing Process Safety Risks.

Deputi Jeneral Menesa bilong Basamuk Rifaineri, Bill Hill i bin strongim dispela het tok long taim em i tok-tok long opim dispela program long Mande Mas 6. Em i tok long taim ol i tok-tok long sefti planti lain i save tingting tasol long sefti long ples bilong wok na long envairomen. Em i tok i gat

narapela kain sefti long Basamuk Rifaineri ol i kolim Process Safety. Em i tok klia long ol woka long dispela kain sefti na strongim ol long luksave long en. I bin gat wan wik selebren i kamap long makim Nesanel Maining Sefti Wik. Ol kain kain ektiviti tu i bin kamap long soim olsem sefti i wanpela bikipela samting long laip bilong pipel, long ples bilong wok na long envairomen we ol wok i kamap. Sampela opisa bilong

Kampani i bin go toktok long ol skul, ol skul i kam lukim wanem samting i kamap long Ramu NiCo na i bin gat sefti dril, posta kompetisen na ol kwis kompetisen. I bin gat ol pprais tu long ol dispela kompetisen. Mista Hill i bin salensim ol wokman bilong Kampani long opim tingting bilong ol long ol nupela pasin bilong sefti olsem Process Safety Management na Gender Smart Safety.

Madang – Lae haiwe i bagarap olgeta

Mathew Yakai i raitim

Madang-Lae nesanel haiwe nau em i bagarap olgeta na ol kar i no inap long go i kam isi. Ol papa bilong PMV, ol trak kampani na ol wan wan manmeri i go i kam long ol haiwe i lukim olhap bilong dispela haiwe i no gutpela moa long ran long en. Dispela rot i wok long bagarapim ol bisnis bilong planti kampani na wan wan sitisen bilong dispela kantri. Wanpela len krusa trak we i save ran olsem 4-pela aua long Madang i go long

Lae long wanpela de i bin kisim olsem 8 aua nau long go i kam bikos long rot i no gutpela tumas. Kain pasin i bin kamap long dispela man i raitim stori olsem em wantaim ol pren bilong em i bin ol i bin lusim ples Usino long Fraide Mas 10 long 9 klok nait na kamap long Lae long 7 klok long Sarere moning na taim ol i go bek long Madang ol i lusim Lae siti long Sarere 6 klok apinun na kamap long Usino long Sande 3 klok moning taim. Rot i bagarap tru stat long Usino i go ol-

geta long Lae siti. Wanpela hap we i no gut true m long Asas na Koroba klostu long Waliuim stesin long Usino-Bundi ilektoret. Olsem long piksa, wanpela wara i ran arere long rot long Koroba nau i save ran antap long rot na ol kar na trak i save ran insait long wara. Na taim bikipela ren i pundaun na tait i kamap, olgeta kar i save kam na stop olgeta. Dispela i save holim bek ol ikonomi bilong hailans provins, Lae na Madang we i save yusim dispela nesanel haiwe.



Wanpela 10-sita len krusa we man i raitim stori i ran long en long go long Lae. Foto: Mathew Yakai

PNG Sios holim namba 1 Lida Samit bilong HIV/AIDS

Shirley Gar i raitim UPNG Jenelisim sumatin

OL lida manmeri bilong 20 Sios insait long Papua Niugini i bung long tupela de long wanpela Sios Lida samit na toktok long sampela wei long daunim sik na hevi olsem HIV/AIDS, Jenda bes Vailens (GDV), stigma na diskriminisen na Humen rait.

Dispela bung i kamap long asde Trinde 15 Mas na i pinis tude.

Long las wik Tunde apinun, ol sios lida i bin holim Pri samit woksop long redim ol yet long toktok long dispela hevi we bai kamap. Eksektiv Opisa bilong PNG Kristen lida alaiens, Andrew Hama i tok bai gat 104 lida manmeri, stek holda na ol patna wantaim sponsa bai stap insait long dispela bung.

Siaman bilong PNG Kristen Lida Alaiens HIV/AIDS na Katolik As Bisop Kadinel Sir John Ribart i tok Papua Niugini em Kristen kantri olsem na ol mammeri mas kamap olsem Gud Samariten long daunim dispela hevi. "PNG i bin sanap olsem namba tri kantri wantaim bikipela namba bilong HIV/AIDS insait long Asia Pasifik Rejion," em i tok.

Pakop bai toktok moa long Jenda Bes Vailens

Dispela em namba wan Sios Lida Summit we bai kamap." kadinel Sir John Ribart i tok, "Salens mi lukim long dispela pait em long tok helpim ol manmeri long dispela Sik na long traime long daunim dispela sik."



John Kardinal Ribat, As-bisop bilong Pot Mosbi.



CTSL

TRUSTEE FOR THE DEFENCE FORCE RETIREMENT BENEFIT FUND

TOKSAVE IGO LONG OL PENSENAS

Comrade Trustee Services Limited (CTSL) ilaik toksave long ol pensenas bilong Defence Force Retirement Benefit Fund olsem wok bilong stopim pensen ikamap klostu. Dispela wok bai kamap long namba wan foitnait, long namba fo mun long dispela iar.

Long dispela toksave mipela singaut long ol pensensas istap nambaut long Papua Niu Guinea bai pulamapim wanpela pepa mipla kolim long **'Pension Form'**. Sapos yu pulamapim pinis dispela pepa em bai pensen bilong yu bai orait tasol bihain long dispela taim. Sapos yu no pulamapim yet dispela pepa, em bai yu asua na kisim bikipela taim, taim mipela stopim pensen bilong yu. Olsem na bai gutpla sapos dispela toksave iken go kamap long iau bilong olgeta pensenas.

Long kisim moa toksave, kam steret lo opis bilong CTSL or ring kam long ol namba tamblo:

Memba Sevis Opis lo Giraun Plo, Comrade Haus, Seksen 35 Lot 4, Comrade Ples, Hohola, P.O Box 497, Port Moresby, **Telepon:** +675 323-3651/7998-909 **Kwik Piksa:** +675 323-9856 **Email:** benefits@ctsl.com.pg **Website:** www.ctsl.com.pg

Tok Orait Ikam Long Ol Biklain CTSL



INVESTMENT TOKTOK

wantaim DR. STEPHEN NASH

Toktok bilong ol reit i go antap na politik i go antap

PNG, em i wanpela kantri we i gat karamap long ol hevi bilong finenesel maket voltatiliti o long pundaun bilong maket

Long wanpela toktok we Siaman bilong Federal Risev bilong Yunaitet Stet (the Fed) i mekim wantaim het tok, 'From Adding Accommodation to Scaling it Back', we em i bin givim long ol Eksekutiv Klap bilong Chicago, long 3 Mas 2017, em i givim aut klia sain long ol fainensel maket olsem ol sotpela taim reit nau bai i go antap. Ol i lukim olsem mak bilong ol manmeri i lusim wok i pundaun i go daun lusim mak we Fed i laikim long pundaun long en, na long mak bilong inflesen i go antap long mak we Fed i makim long em bai i go antap, na Fed i redi nau long isi isi long apim ol sotpela taim intres reit. Bikpela samting, em Siaman i soim olsem taim ol i larim ol reit long stap daunbilu tumas, na long longpela taim tumas, em bai mekim reit long i mas go antap moa strong; we em bai stopim wok bilong ikonometri liklik taim. Long traim long stopim dispela kain samting long kamap, em i taim nau long isi isi long rausim mak bilong intres reit i stap daunbilu tumas.

Long wankain taim olsem, US ikwiti maket tu i wok long wokim ol strongim prais long ol samting wantaim tok win bilong no gat planti lo tumas na ol takis bai go daun, olsem nau ol i tinging bai nupela Trump edministresen bai kamapim. Sampela gutpela samting bai kamap wantaim Trump, na ol takis na lo plen bilong en, tasol hevi bilong ol fainensel maket, long wok wantaim Trump edministresen, em long tingting olsem dispela pastaim man bilong televisen i kam wantaim birua olsem ol reit bai inap senis nating long wanpela taim ol planti taim. Wanpela man bilong televisen i save long wei bilong kisim ai na tingting bilong ol pipel, tasol em i wanpela las samting tru long laik na tingting bilong ol fainensel maket, na ol i no nidim dispela kain samting, long kain taim we laip i go hat moa long fainensel maket. Wantiam olgeta lukluk, wantiam olgeta ol bikpela toksave i save kamap klostu, klostu, wantiam olgeta kain toktok long tweet, em i mas gat bikpela voletiliti long namel taim. Tasol, sori tru olsem dispela em wanpela samting we yumi olgeta i mas save olsem em bai kamap long dispela kain taim.

Olgeta dispela samting i minim olsem, wantiam olgeta narapela samting, dispela narapela kain amamas i wok long bringim ol mani bilong US ikwiti i go daun, taim ol tingting bilong kisim moa mani i go antap. Samting tru em US maket i wok long mekim samting olsem ol i save tok, 'baim long tok win tasol.' Narapela sait bilong dispela bikpela hap tok em, 'salim toktok tru'. Long narapela we bia yumi tok, samting tru bilong lukim gutpela senis we ol i wetim longpela taim na ol i ting bai gutpela, em i luk olsem i no gutpela olsem ol i ting bai kamap. Hamas taim bai maket 'I baim wanpela tok win' em i samting bilong skelim, tasol birua bilong bon maket, taim em i wok long bihainim wanem samting Fed i wok long mekim em ol i mas lukluk long en.

Long tok klia moa, baksait long developmen i kamap long Fed, long narapela sait, na ol prais bilong ikwiti maket, long narapela sait, em ol developmen long US bon maket. Taim ol longpela taim yil o mani bai i go antap yet, wantiam tingting bilong sais bilong Fed i go antap, long sotpela taim reit, em ol i pasim long dispela taim, ating ol samting bai senis na senis long bikpela wei. Bikpela samting, sapos bon maket i stat long wari long ol bikpela wok bilong Fed, em bai longpela taim mani bilong kamap bai go antap winim 3 pesen.

Bai yumi tok gen olsem wankain olsem US ikwiti maket i pundaun bikos ol i bin putim bikpela mak nating long polisi bilong Fed. Taim ol investa i bungim bikpela tok promis bilong mani i kam long bon maket, ol i ken stat long senis; long ol ikwiti i go long ol bon. Sapos dispela senis i go long ol bon bai kamap, oraiti US ikwiti maket bai inap bungim ol hat taim.

Sapos US ikwiiti i pundaun long prais bilong en, orait ol PNG ikwiti bai i mas bihainim dispela kain prais, tasol wantiam wanpela step i go baksait, bikos i no gat likwiditi long PNG fainensel maket. Taim ol intres reit i go antap long US, olsem toktok i kamap long antap, US dola bai go antap long mani mak bilong en, na dispela bai putim moa presa antap long PGK insait long namel taim. Tasol, ol toktok i bin kamap i no longtaim i go pinis namel long Inter Oil na Exxon em i gat gutpela sain olsem bai PNG LNG i skruim wok bilong en i go sampela yia, na gutpela samting bai kamap long stat bilong Papua LNG. Taim moa mani bilong narapela kantri i wok long kam insait long ol LNG developmen, dispela mani i kam insait bai helpim long levelim mak bilong bikpela intres bilong PGK, we planti lain long kaintri i wok long mekim long dispela taim. Isi isi long makim level bilong karensi maket, bungim wantiam gro bilong LNG developmen i mas kamap olsem karamap bilong PNG liklik, long ol globol fainensel maket we i save pundaun nating; na pasin bilong maket i pundaun nating i luk olsem bai kamap. Hamas karamap bai kamap em em i no klia tumas, tasol sampela karamap em i gutpela moa long i no gat tru.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

**BIGGER, BETTER, SAFER,
STRONGER AND STILL NUMBER 1**

Air Niugini winim Kina Isilon employa winim wils promosen kar



Eksekutiv Jenerel Menesa bilong Kina Benk Danny Robinson i givim ki bilong nupela L200 ute i go long tupela menesa bilong Air Niugini taim Boroko Motors Menesa i lukluk. Poto Nicky Bernard.

AIR NIUGINI i kamap wina bilong winim kar promosen bilong Kina Benk Isilon promosen long winim kar we i bin stat long Februari na pinis long Desemba 31 long 2016.

Kina Benk i tok aut long wina na givim nupela kar long Air Niugini het opis long long Pot Mosbi long Tunde dispela wik.

Dispela nupela kar em L200 Ute we Kina Benk na Boroko Motors i wokbung wantaim long kamapim dispela promosen long las yia.

Air Niugini Jenerel Menesa Kastom na Maketing, Dominic Kaumu i tok tenkyu long Kina Benk long kamapim dispela promosen.

Mista Kaumu i tok, Kina Benk i mekim ol i kirap nogut long bringim dispela nupela L200 ute i kam long opis bilong ol long seven mail. Em tokim ol bik manmeri bilong Kina Benk olsem dispela kar bai ol lukautim gut long mekim wok bilong Air Niugini.

Kina Benk Eksekutiv Jenerel

Menesa, Danny Robinson i tok Kina Benk i amamas long givim bek samting i go long ol kastoma bilong ol insait long dispela kain promosen.

Dispela Isilon Employa Winim Wils promosen, Faiv long Draiv promosen em bilong 5-pela tok orait Isilon ol kisim long las yia.

Air Niugini winim dispela L200 ute taim ol pikim nem bilong ol long las Mun taim ol mekim dro. Moa long 170 entri bin stap long winim dispela ute.

BSK Rifaineri i pinisim sefti wik wantaim gutpela stori na dispela em ol poto bilong sefti wik



Nicholas Genaia i kisim namba tu ples awod bilong posta resis bilong CA dipatmen.

Wina bilong Sefti kwis resis.



Wina bilong foklip sefti draiva resis. Ol poto: Ramu NiCo Midia.

Didiman toktok



Profesa John Warren - Vais Sansela, PNG Yunivesiti bilong Nesurel Risos na Envairomen i raitim

5-pela rul o lo bilong kamapim gutpela balsa diwai

Balsa em i wanpela gutpela diwai we ol fama long Is Nu Briten Provins (ENBP) i ken planim long kisim mani taim ol i salim long ol kampani. Fama bai no gat gutpela wok bilong balsa. Em bilong planim, katim na salim go ovasis maket tasol.

Balsa fama i mas save long rot bilong planim gutpela balsa. Displa Fact Sheet #3 of 6 bai soim yu dispela gutpela rot. I gat 5-pela rul bilong groim gutpela balsa:

Rul 1: Rait hap – hap bilong planim balsa i mas gat gutpela rot i go na stap longwe long ol samting.

Hap: Hap bilong planim Balsa i mas stap klostu long rot bilong kar we bikpela kar i ken go insait na tu isi long man i wokabaut. Planim Balsa diwai moa long 40 mita longwe long ol haus, pawa lain na ol narapela samting we yu planim long kisim mani olsem kakao na dispela bai stopim bagarap we bai kamap long taim bilong katim o taim win i pundanum ol. Planim Balsa klostu tumas i ken pundaun antap long haus. Planim 60 as bilong balsa diwai em inap tasol long katim raun log namba we yu inap long salim long kampani.

Rul 2: Gutpla sid – baim gutpla sid o pikinini diwai.

Balsa sid: Balsa sid-pod i holim balsa sid insait. Gutpela long baim gutpela sid, no ken kisim sid nating long bus. Baim gutpela balsa pikinini diwai long neseri we i save kamapim na salim gutpela balsa pikinini diwai, no ken kamautim pikinini diwai nating lo bus na planim bikos em bai no inap gro gut na kamapim liklik raun log tasol bilong salim.

Rul 3: Rait Speis – planim long 4 x 4 mita spes.

Rait spes: Long 4 X 4 mita spes balsa bai gro gut na kamapim gutpela sais diwai bilong katim na salim. Gutpela sais diwai mesamen bilong em 41 cm. Taim bilong katim na salim bai kamapim gutpela raun log. Liklik sais diwai mesamen bilong em i stap aninit long 20 cm, em liklik tumas long katim raun log bilong salim olsem na bai katim tasol na lusim long fil long taim bilong katim.

Rul 4: Lukautim gut balsa – klinim bus, katim han diwai na lukaut long ol narapela bagarap tu.

Klinim bus: Kamautim bus raunim as bilong diwai long han. Insait long namba wan 6-pela mun bai katim na daunim bus, bihain long 6-pela mun balsa lip bai gro bikpela na karapim bus aninit long em i no ken gro.

Katim han: Yusim so long katim kru bilong han diwai long jeket o fok we yu les long en. Bihain long tupela o tripela, mun kam bek na katim na rausim bus long as bilong diwai na lukaut long no ken kamapim bagarap long diwai. Piksa antap i soim namba wan kat na long namba tu kat em long as stret na i mas katim wantaim pruning so.

Lukautim balsa: Paia i save kilim dai balsa olsem na katim gras aninit long stopm paia long kamap. Binatang no gut olsem demdem na anis i save bagarapim yangpela balsa olsem na katim gras em i gutpela rot long stopim binatang long bagarapim balsa.

Rul 5: Gutpla kampani – painim kampani we em i ken baim balsa bilong yu long gutpela prais.

Gutpla mani bilong balsa....

Sapos wanpela fama bihainim gut ol dispela 5-pla liklik rul em bai gat sans long planim na kisim gutpela mani long balsa. Bikpela samting yu mas lukim wanem hap balsa em fitim insait long plen yu gat long gutpela sindaun bilong ol famili bilong yu.

Gavman i mas rivaissim lo bilong Foren bisnis kampani

WANPELA bisnis lida bilong Nuku, Sandaun provins, Moses Nasam i makim maus bilong ol papa graun bilong Sandaun Provins na i singaut long gavman i mas stretim lo bilong Foren bisnis kampani i kam insait long kantri.

Mista Nasam i bin tokim Wantok Niuspepa long dispela wik olsem em i laikim Ministri bilong Komes Tred na Indasti long glasim gut lo bilong foren bisnis kampani nau i wokim ol bisnis long kantri na skelim ol gut pastaim long ol i ken wokim bisnis. Em i tok planti ol lain bilong Esia i wok long kam insait na kisim ples long wokim kain kain bisnis na daunim sans bilong ol lokal bisnis manmeri.

“Luk North Polisi nau i bagarapim sans na rot bilong Papua Niugini asples na papa na mama graun long wokim bisnis na kamapim

wok ples bilong ol skul liva. Nau olgeta gavman graun bilong wokim bisnis ol Esien i kisim na ol i ranim bisnis na bagarapim ol rait bilong ol citizen long wokim bisnis.

Ol boda sekyuriti i mas wok gut. Sandaun provinsal gavman wantaim Sandaun Provinsa Edministresen, Kastoms opis, polis, Difens Fos, Egrikalsa Laipstok na Komes na indastri opisa i mas kirap na sanap wantaim na banisim gut bisnis impota na ekspota bilong ol Esia kantri husat i no bihainim lo na kalsa bilong Papua Niugini na Melanesia pipel long wokim bisnis.

Las yia 2015 na 2016 na dispela yia 2017 ol Esien bisnismen na meri i bin brukim lo na ol i go long Vanimo, Aitape, Wewak na Maprik na Nuku, Lumi distrik long Sandaun provins na ol i baim ol Vanila bin i no redi gut na ol i stilim Vanila bin

bilong Vanila Groa bilong Palai LLG Eria insait long Nuku distrik.

Mi olsem seketeri bilong Torricelle Kopretiv Sosaiti na wanpela Dairekta long Bod i pilim pen na dispela em i bikpela hevi tru.

Gavman nau bai fom long 2017 i mas stretim dispela Bisnis Invesmen hevi.

Ol kampani bilong Esia we i no gat graun long Vanilla, Kakao na Kopra i wok long kam long salim ol samting bilong stua na pektori olsem tinpis, rais na ol i no ken ekspotim vanilla, kakao, timba na ol narapela samting olsem.

“Mi singaut long gavman long lukautim gut na no ken larim ol stilman na meri bilong Esia long kam insait long wokim bisnis na bagarapim asples manmeri. Gavman i kamapim planti lo tumas bilong bisnis manmeri long baim olsem



Moses Nasam em i Seketeri bilong Torricelle Kopretiv Sosaiti bilong Nuku Distrik long Sandaun provins.

Ekspot laisens, rejista setifiket, NAQIA, Kastom Ejensi, IRC na planti moa takis tasol i no gat propit.

Mista Nasam i tok em i raitim pas i go long Nesanel Komes, Tred na Indastri long wokim na stretim dispela hevi long wok bilong Foren Invesmen i kam insait nating long PNG na i no bihainim gut lo.

Raikos Memba Helpim Skul Fee

Paulus Tali i raitim

Memba bilong Raikos Ilektooret long Madang Provins, James Gao i helpim long baim skul fi bilong ol sumatin bilong Raikos aninit Long ELC Nanikina Tamaiwe Skolasip.

Skul Fi em hevi long papamama olsem na ol i amamas tru olsem memba bilong Raikos i baim fi bilong Nankina sumatin long dispela yia, 2017.

Mista James Gao i luksave long hevi bilong skul fee na em i givim sek mani olsem K37,397,00, long 1-

pela sumatin nau enrol long Balob Tisa Koles long Lae.

Dispela em namba wan taim long Mista Gao i sapotim ol yangpela bilong Saidor long kam long Balob Tisa Koles aninit long skolasip program bilong Tamaiwe. Siaman Narcus Kuru i tok bikpela tenkyu i go long Memba Gao.

“Ol Papa Mama i no inap long baim fi tasol yu kam wantaim sapot em bikpla samting we em bringim bikpela amamas long ol man meri long ples long bel yu givim na 11-pela sumatin, 6-pela boi na 5-pela pikinini nau

enrol long Balob Tisa Koles.

Siaman bilong ELC Nankina Tamaiwe, Kuru Narcus i tok, em luksave long samting memba bilong Raikos i mekim na singaut tu go long Morobe Gavman long sapotim ol sumatin long wan wan distrik. Long wankain taim singaut tu go long ELCPNG Skolasip Opis long i mas lukluk long ol kain pikinini stap long ples we no gat sapot, ol i mas helpim ol kam long institusen long kain program bilong skolasip.

Long 2018 memba bilong Raikos bai givim sapot long

husat yangpela sumatin laik go skul long Balob Tisa Koles. Tu em i tok em bai sapotim 5-pela long Balob Tisa Koles, 5-pela Braun Komuniti Helt Woka long Butaweng, 5-pela long Gaubin Helt Woka skul na 5-pela long Madang Tisa Koles.

Siaman Kuru Narcus i makim maus bilong ol papamama bilong ol sumatin long dispela yia 2017 tokim memba bilong Raikos, “Yu mekim bikpela samting long salim 11-pela sumatin nau kam long Balob Tisa Koles long Lae. Bikpela tenkyu i go long yu Mista James Gao.”

Saspek long dai bilong sikmeri na pipel kisim bagarap

Paulus Tali i raitim

OL lain long ples Gomumu nau i no stap gut bilong wanem sampela lain i sutim tok long narapela lain long kilim meri i dai. Long dispela saspek toktok bilong ol tasol na pait i kirap na ol i kilim nating gutpela manmeri.

Wanpela meri long Gomumu insait long Ranara seket long eria bilong Raikos i bin gat sik long bodi longpela taim na long taim em i dai ol wan hauslain bilong em i sutim tok i go long narapela grup em Yambung famili grup.

Long dispela tok giaman tasol tupela grup i kirapim bikpela pait na bagarapim ol arapela manmeri nating. Nau planti tausen manmeri

i no stap gut long dispela giaman pasin tasol.

Dispela hevi i no pinis yet. Las yia 2016 kam inap long nau ol 55-pela manmeri pikinini i dai nating nano gat gutpela as.

Foapela sios lida olsem evanjelis long Ranara seket i bin kam long ELCPNG Het Opis long lukim ol sios lida long dispela hevi we i bagarapim laip bilong ol Kristen.

Wanpela bilong ol wokman we ol i kam long Niniko, Evanselis Kerry Bongo i tokim nius olsem, “Mipela ol evanjelis wok misin long Niniko long strongim bilip bilong ol kristen, givim komunien tasol tupela grup i pait nating na bagrapim laip bilong ol na mipela wari.”

Plantil ol man meri pikinini nau ol i no stap stret long ples, no gat, ol slip nabaut long bus, no gat kaikai. Sampela bilong ol i lusim ples na kam kisim blok long Ramu Sugar. Evanjelis Bongo Kerry tok, “Mipela i no gat pasto tasol mipela evanjelis yet mekim wok misin na strongim bilip bilong ol pipel nau i stap.

Ol arapela liklik sios olsem Evanjelikel Bradahud Sios, na Baptis, Sevende na Foskwea ol i givim helpim long kaikai na arapela sapot. Evanjelis Bongo i bin kam long Lae wantaim arapela evanjelis em Katero Maningo, Rombin Koua na Biti Esonu. Ol i tok kamap bilong mipela hia long Het Opis bilong ELCPNG, em bi-

long painim rot long helpim na bringim laip bilong Kristen kam bek long sios.

Ol ELCPNG Sios Lida bin bung na ol i tok bai ol i lukluk moa long hevi long daunim na bungim gen Kristen bilip manmeri long tingim bikpela Jisas long laip bilong ol. Evanjelis Esonu Bitti i tok moa olsem Niniko Kristen long Ranara seket i gat moa long 3,500, na namba wan grup ol yangpela kisim konfemesen blesing.

Singaut kam long ELC Madang Distrik long lukluk long sapot long kaikai samting. Wankain askim tu kam long ELCPNG long helpim long kaikai na ol buk na arapela samting bilong strongim gen ol kristen manmeri long kam bek long sios.

2017 NRL Dro bilong raun namba 2

| Det | Hom | Awe | Pilai Graun | TV | Taim |
|----------------|-----|-----|--------------------------|-----------|---------|
| Fonde, Mas 16 | | | AAMI Pak | Nine, Fox | 8:05 pm |
| Fraide, Mas 17 | | | Forsyth Barr Stediam | Fox | 6:00 pm |
| Fraide, Mas 17 | | | CBus Super Stediam | Nine, Fox | 8:05 pm |
| Sarere, Mas 18 | | | McDonald Jones Stediam | Fox | 4:30 pm |
| Sarere, Mas 18 | | | Pepper Stediam | Fox | 7:00 pm |
| Sarere, Mas 18 | | | 1300 Smiles Stediam | Fox | 9:00 pm |
| Sande, Mas 19 | | | GIO Stediam | Nine, Fox | 4:00 pm |
| Sande, Mas 19 | | | Souten Kros Grup Stediam | Fox | 6:30 pm |

2017 NRL Lata | TELSTRA PREMIASIP

| Posisen | Tim | P | W | L | D | B | F | A | +/- | Pts |
|---------|-----|---|---|---|---|---|----|----|-----|-----|
| 1 | | 2 | 2 | 0 | 0 | 0 | 54 | 28 | 26 | 4 |
| 2 | | 2 | 2 | 0 | 0 | 0 | 38 | 16 | 22 | 4 |
| 3 | | 2 | 2 | 0 | 0 | 0 | 60 | 42 | 18 | 4 |
| 4 | | 2 | 2 | 0 | 0 | 0 | 41 | 36 | 5 | 4 |
| 5 | | 2 | 1 | 1 | 0 | 0 | 60 | 42 | 18 | 2 |
| 6 | | 2 | 1 | 1 | 0 | 0 | 58 | 44 | 14 | 2 |
| 7 | | 2 | 1 | 1 | 0 | 0 | 46 | 39 | 7 | 2 |
| 8 | | 2 | 1 | 1 | 0 | 0 | 56 | 52 | 4 | 2 |
| 9 | | 2 | 1 | 1 | 0 | 0 | 56 | 52 | 4 | 2 |
| 10 | | 2 | 1 | 1 | 0 | 0 | 46 | 44 | 2 | 2 |
| 11 | | 2 | 1 | 1 | 0 | 0 | 36 | 48 | -16 | 2 |
| 12 | | 2 | 1 | 1 | 0 | 0 | 36 | 54 | -18 | 2 |
| 13 | | 2 | 0 | 2 | 0 | 0 | 30 | 40 | -10 | 0 |
| 14 | | 2 | 0 | 2 | 0 | 0 | 44 | 66 | -22 | 0 |
| 15 | | 2 | 0 | 2 | 0 | 0 | 30 | 58 | -28 | 0 |
| 16 | | 2 | 0 | 2 | 0 | 0 | 32 | 62 | -30 | 0 |

Ol NRL pilaia i kisim bagarap

OL pilaia bilong 16 klap insait long Nesenel Ragbi Lig (NRL) resis i bin kisim bagarap na ol i rausim ol taim ol i opim 2017 NRL Telestra Premiasip.

Tom Opacic bilong Broncos i kisim bagarap long solda na het bilong Matt Gillett i spin liklik taim ol i paitim em long het.

Ol pilaia bilong Raiders em, Jarrod Croker i kisim bagarap long skru na Kurt Baptiste i pindaun bikos strong bilong em i pinis. Skru bilong Kato Ottio na Joey Leilua i bagarap na pinga bilong Joe Tapine i bagarap.

Tendon bilong pilaia bilong ol Sharks, Valentine

Holmes, i lus.

Pilaia bilong ol narapela tim tu i bin kisim ol wankain

bagarap. Greg Inglis bilong ol Rabbitohs i kisim bagarap long skru.



Greg Inglis bilong ol Rabbitohs i kisim bagarap long skru taim ol i opim resis egensim ol Easts Tigers.

Cartwright i gat sans long pilai

FOWOD pilaia bilong ol Panthers, Bryce Cartwright, i kisim bikpela bagarap taim ol i pilai egensim ol Wests Tigers long las wik Sande, tasol sken long haus sik i tok klia olsem em i ken pilai gen.

Cartwright i kisim bagarap long join bilong em na em i bin kisim bikpela pen long join bilong em tasol sken long Mande i soim olsem em i no kisim bikpela bagarap.

Nau Cartwright i gat inap sans long pilai egensim ol Sydney Roosters long Pepper Stediam long Sarere.



Pilaia bilong Panthers, Bryce Cartwright.

Mayweather i laik pait wantaim McGregor

FLOYD Mayweather i kam aut long ritaiamen long pait wantaim Conor McGregor.

Mayweather i laikim MMA top paita, McGregor long em i no ken krai long mani na sainim nem bilong em wantaim ol bos bilong em long UFC bilong tupela i

ken bung long kros-kod pait long sama.

Faiv-weit wol sempion i tokim ol sapota bilong em olsem em i les long harim McGregor i givim risen taim em i kamap long hap bilong pait long Liverpool.

“Mi kam aut long ritaiamen

men long pait egensim Conor McGregor. Mi bai no inap long harim ol bai givim sampela moa risen long mani,” Mayweather i tok.

“Sainim ol pepa wantaim UFC bilong yu bai paitim mi long Jun na em i klia. Yu em B-Sait na mi em A-Sait.”



Bipo top paita, Floyd Mayweather, i hangapapim glap bilong em wantaim 49-0 rekot long 2015.



No ken abrusim ol samting we bai kamapim birua

WANPELA wik Nesanel Main Sefti Wik stat long Mas 6 i bin pinis long Sarere Mas 11 we kampani menesmen i salensim ol wok lain long no ken lukim na larim ol samting we bai kamapim birua i stap nating.

Dispela wik i lukim planti sefti ektiviti i bin kamap long kamapim awenes long sefti. Ol lokal skul na sumatin tu i bin joinim dispela sefti wik na droim sefti posta.

KBK Main i sanap antap long sefti het toktok, "Manage Your Risk" (Lukautim Birua bilong you", na Basamuk Rifaineri i bin kamapim het toktok, "Manage Process Safety Risk,"

(Menesim Proses Sefti).

Long taim bilong pasim dispela sefti wik, Mine Register Manesa, Sarimu Kanu i salensim ol wok lain wantaim menesmen long kisim pasin long no ken abrusim o larim ol birua pasin i stap nabaut we i ken kamapim birua olsem kilim man o bagarapim ol masin we bai daunim prodaksen. Em i tok dispela em long kamapim "zero harm 2017", o long dispela yia mas no gat wanpela birua i kamap long projek.

Basmauk Refinery Regista Wok Menesa, Bill Hill i kirapim tingting bilong ol wok lain long mas komyuniket o

toktok na askim samting we ol i no klia long en long ol supavaisa na menesa bilong ol na dispela ken daunim ol planti birua pasin we i laik kamap long en.

Bill na Sarimu i tok strong olsem olgeta wok lain i mas luksave long gutpela bilong sefti na no ken abrusim long kamapim prodaksen tasol we i ken kamapim planti birua na kilim ol yet tu.

"Yumi wan wan i narakain long narapela tasol bung wantaim bai yumi ken mekim planti gutpela samting wantaim,"

"Yumi wan wan mas luksave na abrusim ol birua long sefti sait. Sapos ol risk

em yumi no inap rausim orait daunim ol birua bilong em na menesim gut," Mista Hill i toktok.

Mista Sarimu i tok planti wok lain i save gut tru olsem sefti i kamapim as tru bilong wok prodaksen tasol long bihainim stret na luksave long longpela taim em i hat liklik na bikipela salens bilong kampani.

"Pasin bilong sefti long wan wan wok lain em i gat bikipela salens long sait bilong wan wan kastom na kalsa,"

"Yumi mas mekim sefti i kamap olsem wanpela hebit na i no wanpela ekt o pasin tasol. Long dispela wei bai sefti bai senis na mekim ol woklain luksave olsem em wanpela laip pasin bilong ol,"

"Mi salensim olgeta wok man na meri long salensim yu yet, senisim pasin bilong yu na luk save long gutpela bilong sefti na olgeta taim mas gat pasin long luksave na abrusim birua long sefti na ekesaisim duti long luksave long birua," Mista

Sarimu i toktok.

Vais Presiden bilong Ramu NiCo, Mista. Hu Zhiliang i tok strong tu olsem bikipela birua i bin kamap long Basamuk long 2016 we wanpela Saina man i bin dai em wanpela lesen we olgeta wok lain i mas luksave stret long gutpela bilong sefti.

"Tude em taim yumi i mas luksave long gutpela bilong sefti o sapos yumi lusting na abrusim bai dispela i ken kilim yumi yet," Mista Hu i tok.



Ol KBK Mine driva i testim ol yet long sait bilong seif drive.




Wanpela sumatin long Enikuwai AC Skul long Bundi i tok klia long sefti posta em yet i bin kamapim.



Ol sampela sefti posta we ol woklain i bin kamapim long sefti awenes.



Mine Register Manager, Sarimu Kanu (poinim han) wantaim menesmen i go raun long mainples long inspektim sait bilong sefti.



Elizabeth i tokaut long GC2018 Kwins Baton ...TPNG i amamas wantaim ol



Kwin Elizabeth II i holim Komonwelt Baton long Mas 13, 2017 taim ol i tokaut long Baton Rilei bilong Kwin bilong 2018 Komonwelt Gems bai kamap long Gold Coast, Australia.

TIM Papua Niugini (TPNG) i amamas wantaim olgeta Komonwelt kantri taim Kwin Elizabeth II i tokaut long Kwins Baton bilong Gold Coast 2018 Komonwelt Gems (GC2018) long Buckingham Pales.

Duke ov Edinburgh na Prins Edward i stap wantaim na Kwin i toktok long Komonwelt na ol etlit insait long wan wan Baton.

Baton bilong Kwin bai go raun long olgeta hap bilong Komonwelt kantri insait long 388 de na em bai winim 230, 000 kilomita taim em bai go kamap long las ples. Las ples Baton bai go kamap em long taim bilong opim Gold Coast 2018 Komonwelt Gems long Epril 4, 2018.

PNG Olimpik Komiti bai go pas taim Baton Rilei bilong Kwin i karim toktok bilong Kwin i kam long PNG.

Baton Rilei bilong Kwin i bin karim toktok bilong Kwin i kam long PNG tripela taim bipo em long taim bilong 2006 Melbourne Komonwelt Gems, 2010 Delhi Komonwelt Gems na 2014



Presiden bilong Papua Niugini Olimpik Komiti (PNGOC), Sir John Dawanincura.

Glasgow Komonwelt Gems.

Gold Coast 2018 Komonwelt Gems bai makim 60 yia bilong Baton Rilei bilong Kwin long karim toktok bilong Kwin raun long olgeta hap bilong ol Komonwelt kantri.

Presiden bilong PNGOC, Sir John Dawanincura, i tok olsem Baton Rilei bilong Kwin em i bikpela samting long karim raun na amamas

long taim bilong Komonwelt Gems na em i save strongim ol Komonwelt kantri insait long wol.

"Baton Rilei bilong Kwin bai kam long PNG klostu long pinis bilong yia, long Desember 1 i go inap long Desember 5, 2017," Sir John i tok.

"Mipela i stat mekim plen long karim raun Baton bilong Kwin long ol hap bilong PNG taim baton i kam long

PNG na ol pipel bilong PNG na Tim PNG bai luksave long dispela."

Em i tok moa olsem Tim PNG i bin mekim gut long 2014 Glasgow Komonwelt Gems na i winim tupela gol medal long weiltlifting.

"Nau, Tim PNG i lukluk long mekim gut tu long Komonwelt Gem bai kamap long Gold Coast, Australia long yia i kam," Sir John i tok.

Baim pri sisen rijistresen fi

POT Mosbi Soka Asosiesen bai go insait long fainal bilong pri sisen long dispela wiken long Bisini soka graun. Ol 16 tim bai go insait long fainal bilong ol man na 5-pela tim bilong ol meri.

Fainal bilong ol meri bai go long raun robin na bihain bai lukim husat bai pilai long namba wan, namba tu na tri na foa.

Pilai bilong ol man bai go long 5-pela pul na bihain bai

ol painim husat bai go insait long semi fainal long wiken.

Man husat i lukautim dro na pilai i tok save long ol tim long baim pri sisen rijistresen bipo long fainal. Ol tim husat i no stap insait long fainal tu mas baim bilong ol bipo long propa sisen i stat.

Dispela ol tim husat i no baim rijistresen bai dabolim peimen long taim bilong propa sisen kik ov.

PMSA i statim dispela pri

sisen long bringim ol tim long luksave long ol yet bipo long propa sisen i stat long wanem longpela taim PMSA i malolo long ol bikpela pilai i kamap long Mosbi.

Dispela wiken em ol nokaut gem bai kamap na Bisini soka graun bai kam laip long ol tim long winim pilai bilong ol long go insait long semi fainal bilong pri sisen long wiken antap 25 na 26 Mas.



Lapun traिम tasol: Nasa bilong C-Group i traिम long rausim bal long lek bilong yangpela PS Rutz long pren pilai bilong ol long PMSA pri sisen pilai bilong ol long Bisini soka graun. Poto Nicky Bernard

Dwellers i lukluk long kisim top ples



Kepten bilong Lae City Dwellers, Raymond Gunemba i resis egensim Te Atawai Hudson-Wihongi bilong Auckland long kisim bal long 2016 Osenia Lig resis.

LAE City Dwellers i tok ol bai strongim banis bilong ol yet, sapos ol i gat wanpela sans long daunim, Auckland City, tim husat i go pas na lukautim OFC Sempion Lig resis.

Dewellers i daunim ol Malampa Revivors bilong Vanuatu long Sarere wantaim bikpela poin, 5-2, long Osenia sempionsip.

Dispela poin em inap long salim ol i go antap long top ples bilong Grup C bikos ol i kisim moa gol long ol Auckland City, husat i daunim ol

Western United bilong Solomon Ailan, 2-1.

Kepten bilong ol Dwellers, Raymond Gunemba, i tok olsem ol i trening strong long mekim gut long banis bilong ol.

Wanpela tim tasol long ol wan wan Grup bai go insait long Sempions Lig semi fainal resis bilong dispela yia na Gunemba i bilip olsem ol i gat inap strong long daunim ol Auckland.

"Long las sisen taim mipela i kam long Osenia Lig, mi ting olsem mipela i

no redi bikos mipela i kam stret bihain long PNG Nesenel Lig gren fainal na ol boi i no redi gut," Ketpen bilong ol PNG Dwellers i tok.

"Tasol, dispela yia em olgeta boi i redi gut na i lukluk long dispela resis. Tingting bilong ol i stap long Osenia Lig na olgeta pilaia i lukluk long dispela gem,"

"Sapos mipela i dro em mipela bai stap pas yet long ol Auckland City, tasol mipela i win em mipela bai daunim ol wantaim moa poin."

Hunters i stap namba 2 ples long lata

Philemon Tame i raitim
SP HUNTERS i stap namba 2 ples long lata bilong 2017 Intras Supa Kap resis bihain long namba tu win bilong ol regensim ol East Tigers long Nesanel Futbal Stediam.

Namba wan asples resis bilong ol Hunters long dispela sisen i lukim ol i daunim ol Tigers, 30-20, bihain long planti

asua i kamap long Tigers. Kosa bilong Hunters, Michael Marum, i tok olsem ol boi i nid long mekim gut long sampela hap long ol resis i kam.

“Pilai i kamap long asples, tasol ol boi i strong long abrusim ol Tigers long namba tu hap na nau ol i nid long strongim ran na banis bilong ol,” Marum i tok.

“Mipela i dropim planti bal na givim penelti i go long ol, tasol dispela em i namba tu raun bilong dispela sisen na mipela bai stat mekim gut inap long hia.”

Nau ol Hunters i lukluk long salensim ol South Logan Magpies long raun namba 3. Resis bai kamap long Davies Pak long Sande apinun, 19 Mas.



Pilaia bilong ol East Tigers i painim hat long kesim bal.



Pilaia bilong ol SP Hunters i putim trai.

NFI 1 i daunim NBC long netball semi-fainal

NATIONAL Fisheries Authority (NFI) 1 daunim ol National Broadcasting Corporation (NBC), 30-28, long semi-fainal resis bilong premia divisen bilong Pablik Sevan Netbal resis na i kisim ples long resis long gren fainal salens bai kamap long dispela wiken.

Resis i bin kamap long Rita Flynn indo pilai graun na skoa i sanap olsem NFA i

stap pas, 11-10, long taim bilong malolo.

Resis bilong tupela tim wantaim i kamap strong we tupela i kisim wankain skoa, 20-20, taim belo bilong pinis bilong resis i krai.

Ol i bin givim 10 minit moa taim na ol NFA (1) i skruim skoa i go antap long 25 taim NBC i stap bihain yet wantaim 22 poin.

NFA (1) bai bungim ol Na-

tional Housing Corporation (NHC) long gren fainal resis long dispela wik Sarere.

Long wankain taim, Pot Mosbi Netbal Asosiesen (POMNA) i statim namba wan wiken traime resis bilong 2017 sisen long Rita Flynn auto pilai graun.

Traime resis bai kamap inap long tripela moa wiken bipo long propa sisen bai stat long Epril.



Pilaia bilong NFA 1 i laik tromoi bal i go insait long net.

Trukai Fan Ran okseni kamapim K534, 150



Bos meri long Intenesel Trening Institut (ITI) i bid long taim bilong Trukai Fan Ran T-siot okseni long Royal Papua Yatch Klap, Pot Mosbi, long las wik Fonde, Mas 09.

Philemon Tame i raitim

TRUKAI Fan Ran okseni bin kamap long Pot Mosbi na Lae long wik i go pinis i bin kamapim mani mak long K534, 150 bilong helpim Papua Niugini Olimpik Komiti (PNGOC) long salim ol etlit bilong Tim PNG long tripela bikpela intenesel resis long dispela yia 2017.

Long wankain taim, ol i helpim ol lokal skul long kisim moa mani i go insait long skul bilong ol aninit long ol i salim wan wan T-siot long skul bilong ol.

Ol i salim 31, 200 T-siot long Pot Mosbi na i kamapim mani mak long

K312, 000. Long wankain taim, okseni bilong Cowboys jesi em ol IBS i winim wantaim K3, 000 na Hunters jesi em ol NAC i winim wantaim K1, 600. Bungim mani i bin kamap long okseni long Pot Mosbi K316, 600.

Okseni long Lae em ol i bin kamapim K214, 050 bihain long ol i salim 21, 405 T-siot na Ela Motors i winim Cowboys jesi wantaim K3, 500. Bungim mani i bin kamap long Lae okseni em K217, 550.

Ol top bida long Pot Mosbi em Tru Tru Wara, IBS, SVS, Kina na Paradise Foods Limited na ol top bida long Lae em Ramu Agri Industries, Traisa, Trukai Indus-

tries Limited, Seeto Kui na Papindo.

Trukai Industries i tok tenkyu long ol kopret na gavman ogenaisesen na ol patna husat i go pas na sapotim 2017 Trukai Fan Ran T-siot okseni long Lae na Pot Mosbi i kamap long gutpela mak.

Okseni bilong dispela yia i daunim risal bilong las yia na Nesanel Marketing Menesa bilong Trukai, Maybellynn Fernandes, i amamas na tok tekyu long husat ol lain i bin stap wantaim long dispela okseni.

Trukai Fan Ran wokabaut bai kamap long Jun 11, 2017.



Ol lain husat i stap wantaim long Trukai Fan Ran T-siot okseni i bin kamap long Lae Yatch Klap, Morobe Provins, long las wik Trinde, Mas 08.



Tim Mungkas meri i redi long pilai.



Tim Sisters A gret tim bai stap insait long fainal bilong sofbal resis dispela wiken.



Pilaia bilong PS i redi long autim bal na pilaia bilong Mastas i kam long stopim em long pren pilaia bilong PMSA long wiken.



Pilaia bilong Guria i putim bal long lek bilong em na pilaia bilong Mungkas 2 i putim was long pri sisen pilai bilong PMSA.



Bikpela fowot bilong Tigers i pilim takol bilong ol Hunters.



Stanton Albert i train long lusim takol bilong ol Tigers long pilai bilong ol long NFS long Mosh long las wiken. Hunters i win 30-20.




Israel Eliab bilong SP Hunters i ranawe long pilaia bilong Tigers.

Oi poto: Nicky Bernard



Trai taim bilong Israel Eliab, long bringim skoa bilong Hunters go 30-20.



WHITE TUNA FLAKES
DIANA White

WHITE TUNA
insait
K 2.20



Tasty and Flavourful White Tuna for Everyone!

Manufactured by:
RD Tuna Canners Ltd.



EM TRAI YA !

Adex Wera bilong SP PNG Hunters i lukluk long kamera man bilong Wantok Niuspepa bipo long em putim trai. Hunters i winim Tigers long namba wan hom gem bilong ol 30-20 long NFS long Sande. Poto Nicky Bernard. *Lukim Hunters stori long pes 26.*

Marum i tokaut long 20 man skwat

KOSA bilong SP PNG Hunters, Michael Marum, i tokaut long 20 man skwat husat bai salensim ol Souths Logan Magpies long raun namba 3 bilong Intras Supa Kap resis.

Bihain long ol SP Hunters i winim raun namba 2 long asples, 30-20, egensim ol East Tigers, i gat liklik senis i kamap long ol skwat we Paul Wawa i go insait long skwat bilong ol Hunters na pilai egensim ol Magpies long Sande long Brisbane, Australia.

Marum i tok olsem Stargroth Amean bai kisim ples bilong Bland Abavu na bai pilai fulbek bihain long lo bi-

long Kwinslan Ragbi Lig i stopim em long wanpela gem we em i bin apim lek bilong wanpela birua pilaia na pundaunim em.

Ol i tok orait long David Loko long pilaia long dispela wiken bihain long ol i stopim em long pilai wanpela gem. Em i bin kisim wanpela strongpela takol long raun namba 1. Loko bai pilai fowod long dispela wiken.

Fainal 18 man skwat ol bai tokaut long Fraide na bai lusim kantri long Sarere long go long Brisbane. Gem bai stat long 2.05 apinun long Vavies Pak.

Ol 20 man skwat em;

- 1 Stargroth AMEAN
- 2 Butler MORRIS
- 3 Adex WERA
- 4 Willie MINOGA
- 5 Paul WAWA
- 6 Israel ELIAB
- 7 Ase BOAS (Kepten)
- 8 Henry WAN
- 9 Gahuna SILAS
- 10 Esau SIUNE
- 11 Lawrence TU'U
- 12 David LOKO
- 13 Stanton ALBERT
- 14 Watson BOAS
- 15 Moses MENINGA
- 16 Enoch MAKI
- 17 Wellington ALBERT
- 18 Junior ROP
- 19 Rhadley BRAWA
- 20 Nixon PUT

Wet Sison Taim Bilong Malaria. Lukautim Yu, na Famili Bilong Yu!

*** Treated Mosquito Nets PREVENT Malaria**

*** Visitect TESTS for Malaria**

*** Arterakine Tablets TREAT Malaria**

Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Email sales@johnstons.com.pg

**STOP
MALARIA**

PNGDF i amamas long 66 yia bilong Batalion

Philemon Tame i raitim

OL soldia bilong Papua Niugini Difens Fos (PNGDF) i bin bung na mas long las wik Fraide moning long Taurama Pereid graun. Dispela pereid i bin kamap bikos ol i tingim bek na amamas long 66 yia bilong Batalion.

Dispela pereid i soim olsem bikpela samting long histori bilong PNG we namba wan nesanel difens yunit i kamap long kantri na dispela i makim 66 yia bilong en.

Komanda bilong PNGDF, Gilbert Toropo, i tok olsem namba wan Royal Pasifik Ailan Rejimen (1RPIR) i soim rispek long dispela aniveseri wantaim nambawan pereid.

“Nesanel ileksen bilong PNG i kamap klostu nau na PNGDF i gat bikpela wok long mekim bikos em i wok bilong ol. Ol bai sapotim Royal Papua Niugini Konstabuleri (RPNGC) long lukautim ol pipel bilong PNG i mas stap seif na i no gat wanpela hevi bai kamap, nogat.

“Mipela bai go pas bilong ol pipel bilong kantri i mas makim ol lida bilong ol long ileksen wantaim gutpela tingting. Ol bai no inap

long pretim wanpela lain long taim bilong vot,” Toropo i tok.

Em i tok moa olsem dispela pereid i soim olsem ol i redi long karim aut wok bilong ol pipel na gavman.

“Wanpela bikpela wok bilong mipela em long sapot na rispek long ol wanwok bilong mipela, RPNGC, long redim gutpela ples bilong ileksen long kamap.

“Mipela tu i redi long sapotim narapela bikpela wok, bung bilong ol APEC lida, bai kamap long PNG long yia i kam. PNGDF i redi gut long mekim wok bilong ol long ol dispela bikpela samting bai kamap klostu taim long kantri,” Toropo i tok.

Long wankain taim, Minista bilong Spot, Justing Tkatchenko, i tok tenkyu long ol PNGDF long Taurama bareks i rispek long 66 yia bilong Batalion na i pereid.

Em i tok tenkyu tu long ol PNGDF bai wok bung wantaim RPNGC long lukautim ol pipel bilong klantri i ken vot gut long taim bilong makim lida bilong ol na redim sekyuriti long APEC bung bai kamap long yia i kam.



Ol soldia long Taurama Bareks i soim rispek long 66 yia bilong Batalion na i mas long Taurama Bareks Pereid graun long Pot Mosbi long las wik Fraide, 10 Mas. *Poto: Nicky Bernard*



People connecting People



PNG Air

CENTRAL RESERVATIONS

Phone: + 675 7222 2151 | Fax: + 675 325 4867

TOLL FREE NUMBER 16111 | Email: reservations@pngair.com.pg